

ذکری

ونیا طارق

اسم الكتاب : نكرى
اسم الكاتب دنيا طارق
رقم الإيداع : ٢٠١٦/٢٣٥٤١
الترقيم الدولي: ٩٧٨٩٧٧٦٥٢٧٨٥٠
الطبعة الأولى : ٢٠١٧ - الطبعة الثانية : ٢٠١٨
مراجعة لغوية ، إخراج داخلي : زحمة كتاب
صادر عن : مؤسسة زحمة كتاب للثقافة والنشر
١٥ ش السباق - مول الميرلاند - مصر الجديدة



www.za7ma-kotab.com



دار زحمة كتاب للنشر



za7ma-kotab@hotmail.com



٠١٢٠٥١٠٠٥٩٦

© جميع حقوق الطبع والنشر محفوظة
لمؤسسة زحمة كتاب

المشهرة قانوناً بسجل تجاري رقم / ٨٤٤٨٦
عضوية اتحاد ناشرين رقم ٨٢٢



مؤسسة زحمة كتاب للثقافة والنشر



مش مقدمة

"ذكري" .. أول انتصار ليا .. حتى لو مافيش حد قراها فأكيد هيجي يوم وهيغطيها التراب وفي حد هيبقى عنده الفضول يعرف ليه ماحدث اشتراها وسابوها لحد ما اتنست، وهيقرأها وساعتها هابقي انتصرت برضو.. بأتمنى أوصل هدفي منها، تجربتي الأولى وأتمنى ماتبقاش الأخيرة .

بعض الأجزاء واقعية وحدثت بالفعل

- الطبعة الأولى خلصت والي في إيدكوا دلوقتي الطبعة الثانية وده معناه إنني انتصاري اتحقق ومكمل وعدد مش صغير قرأ أول عمل ليا. ممنونة لذكري على كل حاجة عملتها لي وعلمتها لي .



تمسكوا بمن أحببتهم وإلا ستندرون.



الفصل الأول
(طابق عالي)



نام الجميع وما زالت هي مستيقظة، فقررت أن تستغل الهدوء وتصفي ذهنها، فتحت النافذة كعادتها، بمجرد رؤيتها للسماء، نور القمر، النجوم، قلة الناس في الطريق، وصغر حجمهم لارتفاع البناية والبيوت المظلمة، وجدت نفسها تفكر في كل شيء. ماذا عن تلك البيوت؟! بداخل كل منها من نام متعبًا ومن نام سعيدًا أو باكياً.

ماذا عن الساهرين؟ هل هم ساهرون رغبة في ذلك أم لا؟

تلك الأسئلة لم تجد لها إجابة واضحة .. فهي تؤمن بأن داخل كل منهم حكاية أو ربما أكثر .

لأول مرة تُحب طابقتها العالي، فمنه ترى كل شيء أمامها ضئيلاً .. ضئيلاً جدًّا، لكنها ترى الكثير، لأول مرة تشعر بطيب الهواء، فتأكدت أن الحياة أقل من أن تعيشها مهمومة .

نحن كثيرون في هذه الدنيا، بداخل كل منا ما لا يعلمه سوانا والله. فمعظمنا يتألم إن لم يكن جميعنا.

استيقظت هذا اليوم باكراً على غير العادة، كان لديها شعور بالرضا لم تشعر به منذ زمن، مرت عليها مدة لم

تشعر بها سوى بالألم، كل شيء ضدها، كل شيء عكس ترتيبها وعكس رغبتها، لكن الله لا يُقدر لأحد شرًا قط. تأهبت للذهاب لعملها، وبداخلها أمني أن يمر هذا اليوم على خير! ستقوم بكل ما في وسعها ليحدث هذا .. وإذا لم يحدث فتكفي محاولتها .

دخلت الشركة التي تعمل بها لتجد جميع الموظفين على مقاعدهم وقد بدأوا في أداء مهامهم، وعلمت أن مديرها يريد مقابلتها في مكتبه .. هذا أمر، ولا يوجد لديها أيّ اختيار، عليها أن تذهب على كل حال .

وصلت مكتبه، ووجدته منشغلاً في جريدته، عيناه منصبتان عليها لا تتحرف يميناً ولا يساراً، كأنها عينا تمثال، أغلقت الباب بعنف ليسمع صوته؛ ليعلم أنها هنا، فهي لن تستطع بدء الحوار. فعلت ذلك ليبدأه هو، لكن يبدو أن ما فعلته سيعرضها للجزاء، أو ربما لخسارة عملها كله، بمجرد سماعه لصوت الباب وجدته ينظر إليها وكاد ينفجر غضباً!

- متأخره ليه يا سميجه؟
- أنا آسفه يا فندم.
- ماجاوبتيش على السؤال.
- الطريق زحمه يافندم .. بكرر اعتذارى.



- حد قالك أنا عايزك في أيه؟
- لا. الحقيقة ماحدث قالي.
- تمام .. إتي طبعا عارفه إننا عندنا مؤتمر الشهر الجاي في لبنان.
- آه عارفه.
- وإتي من أحسن الموظفين هنا وأولى الناس عشان تروحي
- ارتسمت ابتسامه على وجهها كأنها لم تبتسم من قبل.
- ده شيء يشرفني.
- بس للأسف في مشكله!
- عاد وجهها ينكمش مرة أخرى.
- مشكلة إيه؟
- لازم الموظفين اللي هيحضروا المؤتمر يحضروا مع أزواجهم .. إتي عارفه إن الفكرة الأساسية للمؤتمر خاصه بالأسره.
- آه عارفه بس أنا مش متجوزه.
- مش إتي مخطوبه؟
- كنت.
- يعني أشيل اسمك من قائمة الموظفين المرشحين للحضور؟
- لم تتردد وجاوبته بلهفة:
- لا يافندم .. هحضر إن شاء الله.

- طيب ياريت تتصرفي ولو ماعرفتيش قوليلي عشان أشوف حد يحضر مكانك.
- هحضر إن شاء الله.
- ماشي روجي على شغلك دلوقتي.
- تمام بعد إذن حضرتك.
- إفضلي.

خرجت من مكتبه وهى تتمنى أن تكون حياتها كشريط الفيديو تستطيع إيقافه في لحظة ما. توقفه عند استيقاظها! لماذا؟! لم تتخيل أن تكون بداية يومها كهذه، لا تعلم كيف يجب أن تكون حالتها بعد هذا الخبر! استوقفتها (نجلاء) زميلتها في العمل :

- إيه يابنتي؟ إيتي إترفدي ولا إيه؟
- ياشيخه فال الله ولا فالك.
- أمال مالك قلبتي وشك ليه؟
- أستاذ مدحت كنبني ف قائمة المرشحين للمؤتمر.
- طب دي حاجه المفروض تفرحك.
- المفروض. بس الحلو مايكملش.
- مش فاهمه!
- لازم أكون متجوزه.

رن صوت قهقهة الأولى في أذن الثانية، كادت أن تخنقها وتصدم رأسها بالمكتب.

- أنا آسفه يا سميحه.. إتي فقره أوي بصراحه. يعني بعد ما تفسخي خطوبتك بشهرين يجيك عرض زي ده؟!!

نظرتها كانت كافية لترد على سخافتها، فضلت أن تصمت.

- خلاص ياستي.. ماتكشيرش كده.. مش آخر مؤتمر يعني.

- إتي عارفه أنا كان نفسي أحضر المؤتمر ده أزاي .. بس برضو مش هفوته عليا لإنها فعلاً فرصه ماتتعوضش.

- هتعملي إيه يا مجنونه؟

- هتصرف.

- ربنا يهديكي يا سميحه.

- ركزي ف شغلك طيب.

.....

أنهيت عملها، لكن تفكيرها في المؤتمر لم ينته بعد. تتخيل نفسها تشرح لجميع الحضور كل الأبحاث التي قامت بها، وكل المشاريع التي سهرت ليلالي طويلة لتكملها. ترى نفسها تحمل درع الموظفة المثالية، وتبتسم للجميع في فخر. ياترى ستظل أحلاماً وخيالاً أم ستكون لديها فرصة لتحقيق ذلك؟!!

خرجت من مقر عملها وسارت في الطرق تنظر في وجوه الناس. كم تحب النظر في وجوههم لتشعر بما بين أعينهم من أسي فترضى بقضائها! تؤمن بأن حالها أفضل. سيطر المستقبل على تفكيرها ، لكن أقلت منها زمام الماضي، تدور الذكريات برأسها ولا تستطيع أن توقفها، تتذكر إنهاء علاقتها بالشخص الوحيد الذي أحببته وتعلقت به، تتذكر تركه لها في منتصف الطريق وحدها دون سند. لا تظن أنها مستعدة للدخول في تجربة أخرى، حتى وإن كانت مؤقتة. كيف تحل مشكلتها؟! هل تطلب منه أن تعيد الخطبة ويتمان الزواج حتى تحصل على المكانة التي تريدها في عملها لكن تخسر مكانتها في الحياة ككل؟! تخسر نفسها كي تكون أدق! أم تخسر فرصة المؤتمر وتدعو الله أن يقدم لها فرصة أفضل أو مثلها على الأقل؟!!

صادفت مسجداً وهي تسير، فقررت أن تدخل. لم تعتد الصلاة في المساجد، أو ربما تكون مقصرة كثيراً بأمر الصلاة عامة. وبعد أن أنهيت صلاتها، وجدت امرأة عجوزاً تجلس عند زاوية تقرأ في مصحف فسألتها :

- هي المصاحف فين؟
- هناك في المكتبة الصغيره دي.
- شكرا.



- مالك يا بنتي؟

بدت على وجهي علامة استفهام!

- إتي أول مرة تيجي المسجد؟

- بصراحه آه.

- ما فيش أحلى من القرب من ربنا واستخارته في كل شيء .. إتمسكي بأي علامة
تجيلك من ربنا يا بنتي.

لم تفهم ما روته، لكنها شعرت براحة تجاه حديثها ..
قرأت في المصحف، وكانت تحاول أن تكون في كامل
تركيزها .. كانت تقرأ سورة يس .. وجدت قلبها يرتجف
حين قرأت :

[بسم الله الرحمن الرحيم]

{ إنما أمره إذا أراد شيئاً أن يقول له كن فيكون (٨٢)

فسُبْحَانَ الَّذِي بِيَدِهِ مَلَكُوتُ كُلِّ شَيْءٍ وَإِلَيْهِ تُرْجَعُونَ (٨٣)

{ * سورة يس *

[صدق الله العظيم]

عادت إلى حيث تعيش، تقيم في سكن جماعي، أنت هي
واثنتان من قرية صغيرة إلى القاهرة لتجدن فرصة عمل
مناسبة لطموحاتهن التي تهدمها المحافظة التي ترعرعن
فيها لقلة إمكانياتها .. تأقلمن على العيش معاً وأصبحن
مقربين لبعض ..

دخلت السكن لتجد واحدة منهما جالسة على الأرض،
تضع أمامها مجموعة من الصحف والمجلات ليست
بالقليلة. أهل الصحف تطاردها اليوم؟!!

- إيه اللي مقعدك على الأرض كده؟
- بدور على شغل.
- ليه يا مروه إتي مش مرتاحه ف شغلك؟
- لا يا بنتي ده مش ليا .. ابن خالي من البلد بيدور على شغل ومش لاقى،
وبصراحه هو شاطر أوي وطالع ترتيب على دفعته بس مش لاقى فرصه .. ده
غير إنه بيصرف على مامته وإخواته من بعد ما خالي مات فبحاول أساعده.
- وجدت لسانها يسأل بدون تردد:
- هو متجوز أو خاطب؟
- لأ. يبحب واحده ولسه ماتقدم لهاش عشان ظروفه .. ليه؟

في واحدة من المناطق السكنية الجديدة التي تم تعميمها
في فترة قصيرة وقد أحاطت الحدائق الصغيرة بالمباني
التي تم بيع أغلب الشقق فيها، ورغم الهدوء المُسيطر
على تلك المنطقة، إلا أنها مليئة بالحياة والبهجة؛ لما
تحويه من زهور زُرعت على الشرفات، وأشجار عليت
على جوانب الطرق، وفرحة السكان بمنزلهم الجديدة

..... وفي داخل شقة من زوات الطوابق العليا، ارتفع صوت رقيق ينادي.....

- يا مريم تعالي بقى أنا تعبت من حاجتك اللي مابتخلصش دي.
- لأ. سيبي الحاجه دي دلوقتي .. أنا عملت كوبايتين شاي نشرهم مع كيكه خالتك ف البلكونه.
- طيب قشطه.

* في البلكونه (١٠ مساءً) *

- بجد أحسن حاجه إن خالتو أقنعت ماما نيحي نسكن جنبكوا هنا .. المكان حلو أوي وكان هنبقى قريبين من بعض.
- الأهم من كل ده عمليتي إيه ف موضوع الجامعه؟
- سحبت ورقي وهحول ف الجامعه هنا.
- هتضيعي ٣ سنين عليكي!؟
- ماتتي عارفه إني ماليش ف الجغرافيا ودخلتها عشان أبقى مع صحابي .. بس بما إني جيت هنا ومش هيبقوا معايا فهدخل حاجه بحبا.
- ماشي يامتر.

- بقي بقى .. شكل حقوق مش هتقبلني بسببك.

وتقطع حديثهما والدة مريم (مایسة)، ووالدة نور (ماجدة):

- إنتوا مابتزهقوش من الرغي؟

نور وهي تضحك :

- ليه كده يا خالتو ده أنا مجبك.
- طب يلا يانور نروح بقى عشان كده هنتأخر أوي.
- لا يا خالتو باتوا معانا النهارده عشان عايزه نور تيجي معايا بكرة مشوار .. وكمان تعرفني على المكان هنا.
- خلاص يا ماجده خليكوا النهارده وبالمره نروح البنك سوا بكرة.
- ماشي موافقه.
- ظهرت السعادة على وجهي كل من مريم ونور بسبب موافقة والدة نور على البقاء معهم، ودخلا معاً غرفة مريم التي لم تُوضع أغراضها في أماكنها المناسبة بعد، وجلستا على الفراش.
- إيه حكاية مشوار بكرة ده؟
- يا بايخه كنت عارفه إنك هتسألني وهتفتحي تحقيق.
- إنجزي يا ماما إحنا بنام بدري.
- بصي يا ستي ..أنا الكام مره اللي جيت فيهم مع ماما ننقل الحاجه شوفت جارنا في نفس الشارع هنا وشكله محترم وذوق كده ... وبصراحه كده شكل السناره غمزت.
- غمزت إمتي إن شاء الله؟
- يا بنتي ماهي مامته جت عندنا إمبارح تتعرف على ماما وهو جه يوصلها.
- قولي كده بقى.
- المهم يعني أنا عرفت إنه بيشتغل في صيدليه هنا وحابه أروح أفتح معاها أي كلام وحاولت مريم أن تغير من جدية حديثهما، فأمسكت بالوسادة كأنها تحتضنها وأكملت:

يمكن يبقى هو ده فارس أحلامي!

فغطت نور وجهها وقالت :

- طب يا أم فارس أحلامك اتتي إطني النور عشان ننام .. أنا كده سهرت أوي.

- قومي يا ماما بصي الأوضه متبهده إزاي.

- ولا اعرفك .. إتي سيباني أعمل فيها من الصبح .. اعتبريني نمت أصلاً.

استسلمت مريم للنوم، وألقت بنفسها بجانب نور لتبقى
طوال الليل تفكر في فارس الأحلام.

اليوم التالي (ال ٩ صباحًا)

في غرفة مريم..

- يانور قومي بقى بقالي ساعة بمحاول أصحكي.

نور تفتح عينيها وتفركهما.

- خلاص صحيت أهو..

- طيب أنا حضرت الفطار وماما وخالتو فطروا ونزلوا .. قومي بقى عشان نفطر ونروح مشوارنا..

وبينما مريم في طريقها للخروج من الغرفة، نادت نور، فتوقفت مريم لتسمع ما تريد.

- نسيت أقولك إنه كان يوم إسود يوم ماخالتو خلفتك.

ضحكت مريم وخرجت من الغرفة.

* (ال ١٠ والنصف صباحًا) أمام المبنى *

- ده لو جاي يتجوزك مش هتلبسي الطقم ده .. أنا عارفاكي بتلبسي الطقم ده في المناسبات الخاصة بس.

- طب يلا ياظريفة .. أنا عارفه إني مش هخلص منك النهارده.

وتوقفت نور أثناء سيرهما..

- بصي يا مريم .. الفستان ده شكله عسول أوي أنا عايزه أقيسه.

- يا نور مش وقته بقى .. تعالي نروح الصيدلية الأول واحنا راجعين نشوف الفستان وبعدين إحنا قربنا على الصيدليه.

طب روحي اتني وأنا كده كده محرجه أروح معاكي .. هدخل أنا أشوف الفستان

واتي خلصي ونتقابل هنا.

- ماشي اتقنا.

خرجت نور من محل الملابس بعد ربع ساعة ولم تجد مريم، وحاولت الاتصال بها، لكن دون رد. فقررت أن تذهب لتجد الصيدلية، ولم تسر أكثر من خمس دقائق لتجد صيدلية على يمينها، ونظرت بداخلها لتجد مريم، فدخلت ووضعت يدها على كتف مريم.

- يا بنتي اتأخرتي ومش بتري على الموبايل بتاعك ليه؟

نظرت لها مريم، وأمسكت بيدها لتفهم نور ألا تحرجها أكثر من ذلك، وبدأت مريم تتحدث:

- طب أعرفكوا على بعض بقي.

وقبل أن تنهي مريم جملتها، جاء صوت لم يكن بالصوت اللين أو الغليظ، بل كان ذكوريًا، لكنه حنون جدًا.

- إتني نور .. صح؟

لم تكن نور رأت وجه الشاب بعد، فهي لم تكن مهتمة مطلقًا، لكن حين سمعت اسمها نظرت له وفجأة تغير لون وجهها! مريم وهي متعجبة من الموقف:

- إيه ده! إنتوا تعرفوا بعض؟!

- بدأت نور تستوعب الموقف:

- آه ... ده محمد أخو سلمى صاحبتى ف الكليه.
- مريم مستغلة الموقف:
- بجد! ... إيه الصدف الحلوه دي! .. أنا لازم اتعرف على سلمى بقى، وكمان أنا بقيت معاهم ف نفس الجامعه.
- حاول محمد أن يجد ردًا ذوقياً.
- آه طبعًا ده شيء يشرفنا.
- نور وكان صوتها يرتعش :
- طب يلا يا مريم بقى عشان هنتأخر.
- لم تفهم مريم تغير حال نور فجأة، لكنها كانت سعيدة بتلك الصدفة التي ستقربها من محمد وأسرته.
- فرصه سعيدة جدًا يا محمد ومعلش عطلناك.
- لأ طبعًا .. إحنا جيران ما تقوليش كده .. نورتوني.
- مريم بابتسامه:
- ميرسي جدًا مع السلامه.
- مع السلامه ..
- ثم نظر لنور التي كانت تنظر له، لكنها تبدو في عالم آخر ...
- مع السلامه يا نور.
- بدأت نور تُعيد تركيزها حين سمعت اسمها ثانية:
- مع السلامه.



وسحبت نور مريم من يدها وخرجتا من الصيدلية.
ظلت مريم تتحدث منذ خروجهما من الصيدلية وحتى
وصولهما غرفتها، لا تتوقف عن وصفها له وعن مدحها
له، وتحكي كم باتت تحلم بمثله أياماً وأياماً! ... لكن نور
لم تنطق بكلمة.... هي حتى الآن لا تفهم كيف يحدث كل
هذا فجأة! ... وماذا يمكنها أن تفعل؟!!

- مالك يا نور؟ إتي مودك اتغير فجأة ليه؟ إتي ماجبتيش الفستان اللي عجبك ولا
إيه؟

ونور لا تجيب، فلوحت مريم بيدها لتلفت انتباهها:
- هاي نحن هنا.

- ها ... بتقولي إيه يا مريم؟!!

- ده اتي ف دنيا تانيه خالص .. أنا هقوم آخذ دش.

- طب انا هاخذ ماما واروح بقي.

- ليه يا نور بقي؟ أنا مبسوطه إننا قاعدين سوا.

- معلش يا مريم .. أصلي سايبه العصافير هناك وخايفه يموتوا.

- طب خلاص زي ماتجبي.

ابتسمت نور لمريم، وكادت مريم تصفعا على وجهها
لتعيد لها وعيها، فلأول مره ترى نور غير متزنة بهذه
الطريقة.

* (١٢ بعد منتصف الليل) *

محمد جالس على مكتبه داخل غرفته التي يسميها معظم الوقت مملكته، يكتب خواطره كعادته، وأحياناً يكتب يومياته ومذكراته إذا كانت تستحق التدوين، وبينما هو منهمك في ذلك، يسمع طرقات الباب:

- ادخلي يا سلمى.

تدخل سلمى فور سماعها ذلك.

- يابن اللذينه! عرفت منين إن أنا اللي بخطط عليك؟!

- ما أكيد ماما نايمه من بدري وبابا هيبات ف شغله النهارده .. بيتي أكيد مافيش غيرك يقرفني.

- إيه الرخامه دي! بقى انا جايه أرغي معاك تقولي اقرفك!

- محمد يضحك ويرد: أحلى قرف.

- ثبتتي كمان ... المهم بقى .. مالك كده مش متضطب النهارده؟ ... في جديد أنا ماعرفوش؟

- بصراحه آه ... شوقتها النهارده.

- إحلف.

- والله جاتلي الصيدليه النهارده وكنت مصدوم .. بس حسيت إني مبسوط إني شوقتها.

- يا سيدي يا سيدي! .. إوعدنا يا رب.

- يلاً يا لمضه ... ها .. جايه عايزه إيه؟ ماتتي أكيد مش جايه عشاني.

سلمى بأسلوبها المرح:

بغض النظر عن رخامتك يعني. بس أنا فعلاً جايه عشان حاجه تانيه ... أنا جايه
أتكلم معاك ف موضوع ماما وبابا.

-إرغي..

- ماما عايزه تطلق خلاص يا محمد وبصراحه أنا موافقاها.

- وأنا موافقكوا بس مش شايف إن ده الحل الأمثل.

- أمثل بقى ولّا لأ .. مش مهم .. المهم ماما ترتاح شويه لإنها فعلاً تعبانه أوي.

محمد يأخذ نفساً عميقاً ثم:

- طيب أنا هتكلم معاها الصبح .. روجي اتتي نامي وربنا يكرمنا.

سلمى تقف ثم تضع قبلة على جبين محمد وتخرج لتنام
في غرفتها، وينتهي محمد كتابته ويذهب ليخلد في نوم
عميق دون تفكير في الغد وما سيحمله له، فهو الآن واثق
أن الله سيقدر له الخير.

مريم تقف أمام المرأة، وتضع الكثير من مستحضرات
التجميل، وتدخل عليها والدتها وتبدو عليها علامات
التعجب حين رأت وجه مريم في المرأة، فهي لم تعتد
على أن تراها كذلك!

- إيه الجمال ده ... بس غريبه يعني!

- لا .. إتعودي بقى عشان الفتره اللي الجايه هبقى على طول حلوه.

ثم تدور مريم حول نفسها كالأميرات، وتمسك بيد والدتها وتحركها كأنها ترقص معها مثل سندريلا والأمير وتردد:

- أخيراً لقيته يا ماما أخيراً.

مايسه (سعيدة لفرحة ابنتها لكنها لا تفهم) :

- هو مين ده؟!

- قريب قريب هتعرفي مين بس ادعيلي.

- ربنا يرزقك يا بنتي يا رب.

- يارب يا ماما.

- أنا هروح انام ماتنيسش تقفلي الشبايك كويس قبل ماتامي يا حبيبتني.

- عنيا يا ست الكل.

وتخرج مايسة من غرفة مريم سعيدة لما رأته من فرحة في عين ابنتها الوحيدة، لكنها غير مطمئنة!
أغلقت مريم الشبايك، لكن تركت شباك غرفتها ووقفت أمامه، ظلت تفكر لماذا رأته الآن؟! .. أهى صدفة أم قدر؟!
حتى الصدف تكون أقداراً، لكن قدرها ماذا يحمل!؟

تنتهي نور من صلاة الفجر، وترفع يديها للسماء وتدعو:

- يا رب إنت عالم بحالي. قدرلي الخير وقربولي. يا رب لو ليهم خير ف بعض قريهم من بعض ولو ما لهمش خير ف بعض خلي مريم تنساه .. يا رب أنا مش عارفه قدري إيه .. يا رب ارضيني.

وكادت تدمع، لكنها سمعت وقع قدمي والدتها تقترب من الغرفة، فقامت نور لتجد أمها تفتح الباب وتبدأ تحقيقها الذي اعتادت نور أن تشبهه بتحقيقات فريق المخابرات الإسرائيلي كنوع من أنواع الدعابة..

- حرماً.

- جمعاً إن شاء الله ... في حاجه يا ماما؟

- أنا اللي المفروض أسأل.

نظرت لها نور كأنها تقول: كنت عارفه إنه هيبقى تحقيق.

- مالك متشقلبه النهارده كده ليه ومش متظبطه؟

- لا عادي يا ماما.

- إتي فاكزه إني مش هعرف؟ ... لأ هعرف.

حاولت نور أن توقف هذا التحقيق قبل أن تفقد زمام الموقف:

- ماما أنا عايزه انام.

- إهربي من الكلام براحتك.

نور تذهب إلى فراشها وتأخذ وضع النوم وتغطي وجهها.

- تصبجي على خير يا ماما.

خرجت ماجدة من غرفة نور دون رد، لكن التحقيق ما زال مفتوحاً داخل رأسها، لكنها الآن هي السائل والمجيب.

بدأ العام الدراسي، واستقرت مريم مع نور وسلمى في الجامعة، وكان إعجابها بمحمد حافظاً لها لتهتم بدراستها. كونه صيدلياً، فيجب أن تكون ذات مكانة مثله، خاصة أنها تعلم أنه قريب من سلمى وتحكي له عن يومياتها معها، فأرادت أن تكون سيرتها تبهره.

اعتاد محمد أن يقترح عليهن - إذا كان وقته يسمح - أن يأخذهن بسيارته المتواضعة إلى الجامعة، وكانت نور دائماً تحاول الهرب، لكن مريم لا تسمح لها بذلك، وفكرت نور كثيراً ألا تذهب إلى الجامعة، لكن إلى متى! ...فصرفت النظر عن الفكرة.

تنتظر نور خارج مبنى الكلية، وتتنظر كثيراً إلى ساعتها، حتى رأت مريم ممسكة بيد سلمى وتقتربان منها، وبما أن مريم مستجدة، وهذا أول اختبار لها؛ فكانت نور قلقة عليها، لكن حين رأتها مبتسمة اطمأنت بعض الشيء.

- شكلك مبسوط .. طمينا عملتي إيه؟

- الإمتحان كان حلو الحمد لله إئتوا عملتوا إيه؟

- حلو بس سيبت حاجات ف الإختياري.

ردت عليها سلمى:

- هبله ١٠٠ مره قولتلها تقتي.

مريم ضحكت ثم ردت:

يا سلمى الفتى ده اللي جايننا ورا.. إنتوا تفتوا ف علم النفس قشطه، لكن أنا افتي ف حقوق هتحبس.

- طب ها طنط عامللنا أكل إيه النهارده؟

تعجبت نور من سؤال سلمى، وظهر ذلك على نظراتهن لها فشرحت لها مريم ما يحدث.

- آه صح يا نور .. ده محمد وسلمى جاين النهارده عندنا ومامتهم وباباهم كمان.

وأكملت عليها سلمى:

- محمد زمانه جاي ياخدنا عشان يوصلنا أصلاً.

كانتا صدمتين أقوى من بعضهما بالنسبة لنور، وبدأت تتماسك:

طب هسبق أنا عشان ماما بقى.

كالعادة مريم لديها مبرر لكل شيء.

-إستي يابنتي .. أصلاً خالتو مع ماما بتحضر الحاجه وهتتغدوا معنا كلنا.

وفجأة وصل محمد، وأشار لسلمى حتى يركبن معه.

ولم تجد نور مفراً فركبت، لكنها كانت تهرب من نظرات محمد ولا ترد على أي سؤال إلا بكلمة واحدة إذا أجابت، ولا تفتح أي حوار مع أحد منهم. حاول محمد كثيراً أن يخلق مواضيع، لكنها تلتزم الصمت، وسلمى ومريم تجيبان.

وأمام منزل مريم، أخبرتها سلمى أنها ستبدل ملابسها، وسيأتون جميعاً إلى منزلها.

ظلت نور صامتة، حتى بعد وصولها منزل مريم، وطمأنت أمها وخالتها عن اختبارها وفرحتها باجتيازه، لكن وجهها لم يكن يبدو عليه ذلك أبداً، وساعدتهما نور، لكن مريم كانت في غرفتها تقوم بكل المحاولات لتبدو في أحلى صورة لها أمام محمد وأهله.

حتى وصلت عائلة محمد الصغيرة، وجلس الجميع في غرفة السفرة يتحدثون عن أولادهم ويمدحون مذاق الطعام، وأنه يبدو كطعام شيفات أفخم المطاعم، وحين انتهوا، طلبت مايسة أن يجتمعوا في غرفة الصالون.

وما زالت نور تتحرك بدون كلام، وترد على كلامهم بردود بسيطة لتمر من تلك الأسئلة بأقل خسائر.

وكانت سلمى دائماً تحاول أن تنتشر مرحها، محاولة تخفيف جدية ما سيحدث بعد قليل، حتى غير والدها الموضوع وقال:

-قبل ما الوقت يجري مننا يا جاعة إحنا جاين عشان موضوع مهم ونتمنى ماتكسفوناش.

نظرت نور لمريم، وجدتها مبتسمة، وكادت تقول موافقة قبل أن تسمع الطلب.

فأكمل:

-إحنا جاين نطلب إيد نور لابننا محمد.

وكانت الصدمة الكبرى! ظنون نور كانت صحيحة ..

نظر الجميع لبعضهم دون فهم!

حاولت ماجدة أن تجمع الأحداث تغير حال نور، بعدها عن مريم، مريم معجبة بابن الجيران دون ذكر اسمه، مريم تهتم بنفسها على غير العادة، رغبتهم في اجتماع الجميع فجأة! فحاولت أن تنهي الموقف:

- ربنا يقدم اللي فيه الخير يا جماعه إن شاء الله.

أدركت والدة محمد أن ماجدة حاولت أن تجد ردًا مناسبًا، ولم تجد سوى ذلك، فهي أم تشعر بتلك المواقف وما وراء الردود الباردة، فطلبت من زوجها أن يرحلوا. ورحلوا بالفعل.

لكن قبل خروجهم، نظرت نور لمحمد، وجدت عينيه تتحدثان، كأنما تقولان لها لا تتركيني! ... تنظر لمريم تجدها حابسة دموعها.

تدعو نور بداخلها أن يمر ذلك الموقف على خير، وكادت هي أيضا تنهمر دموعها، لكنها تماسكت، فهي حتى الآن لا تعرف. ما حدث معها أم ضدها؟! بدون تردد أخذت ماجدة ابنتها وغادرت بها إلى المنزل دون أن تنطق بكلمة مع أختها التي اعتادت أن تبوح لها بكل شيء كما اعتادت أختها أيضًا. لكن الآن لا يبدو ذلك جيدًا أبدًا

دخلت مريم غرفتها لتبديل ملابسها، وقررت أن تفهم كيف حدث ذلك، فأمسكت هاتفها واختارت أحد الأسماء المسجلة به وضغطت زر الاتصال

*في منزل محمد *

دخل الجميع المنزل، لا أحد يفهم شيئاً. والده كان سعيداً أنه هكذا سيطمئن عليه، فهو ابنه الأكبر والوحيد، وسيتمكن من ترك والدته استجابة لطلبها غير المباشر، لكن يبدو أن الأمر ازداد تعقيداً.. أمه يخفق قلبها سريعاً، تشعر بشعور غريب تجاه رد ماجدة، فهي ربت ابنها وضحت من أجل أبنائها كثيراً، وكانت تدمع فرحاً حين ترى نتيجة تربيته لهم، وأرادت أن تكتمل فرحتها بزواج ابنها الأكبر، لكنها تدعو الله أن يرضيه وأن يقرب له الخير، وطلبت من زوجها ألا يتحدث مع محمد بشأن زواجه من نور حتى تستقر الأمور ووافقها.

طلب محمد من سلمى أن تدخل معه غرفته، ربما كان هروباً من والديه، فهو وضعهما في موقف محرج للغاية، أو ربما ليبحث معها عن حل لمشكلة لا يعلمها من الأساس:

- أنا مش فاهم حاجه! معقوله هي مش حاسه إني معجب بيها يا سلمى؟! طب ازاي؟! دي نظراتها كانت باينه أوي ... أنا كنت حابب أقرب منها والناس كلها عارفه اني بحبها .. مش عايز أقرب منها واحنا مستخين ... كنت فاكّر هروبا مني ده

عشان خايفه من الناس ومن مامتها وعشان ماينفعش اصلاً بس أنا مش فاهم حاجه! ... مش اتتي قريبه منها؟ المفروض تبقى عارفه هي ايزاني ولا لأ ياسلمى! تركت سلمى محمد ينتهي من كلامه كعادتها، فهي تعلم أنه يستشيط غضبًا حين يقاطعه أحد، وبدأت تبحث عن كلمات مناسبة.

- محمد .. أنا صاحبتم آه .. لكن أنا مش قريبه منهم زي مانت فاكرك.

محمد وهو ينظر لها نظرة تعجب:

-مين منهم؟!

- نور ومريم.

- إيه دخل مريم دلوقتي؟

- معقوله انت كل ده مش حاسس!... أنا كنت عارفه إن نور معجبه بيك وده كان بيان من كلامها أوي عشان كده شجعتك ف الأول .. لكن من ساعة ما مريم بنت خالتها جت عندنا الجامعه وبقت وسطينا ونور متغيره .. مش هقولك إنها قريبه من مريم وبعدت عني عشانها .. لا .. نور بعيده عننا إحنا الاتنين وبتقفل أي كلام عنك والكلام اتبدل .. بقت مريم هي اللي بتتكلم عنك ومهتمه ... بصراحه أنا مش عارفه أقولك إيه .. بس ده مجرد إحساس ويارب يبقى غلط.

- وياه هو إحساسك ده؟

- إن مريم بتحبك ونور بتبعد عشان ماتخسر هاش.

- بس أنا ماجمهاش.

- بس هي فاكراك بتحبها.

- طب أنا ذنبي إيه ياسلمى؟ أنا ماعملتش حاجه تحسسها إني بجها .. أنا كت بوصلكوا عشان أقرب من نور مش منها .. أنا بجب نور ماجهش هي.

ضمته سلمى، وبدأت تبثه بعض الأمان. هي بجانبه بكل الأحوال، ولن تتركه، وستبحث معه عن سعادته.

- أنا عايز رقم نور.

- هتعمل إيه؟

- هفهمك بس بعدين.

- طيب ثواني هجيب الموبايل واجيلك.

.....

*** في منزل نور ***

- ممكن تفهميني إيه اللي حصل ده؟!

نور وهي تحاول أن تبدو متماسكة:

-أنا مش فاهمه أي حاجه زيك!

- طيب أنا عدت الموقف أودام الناس .. لكن أنا مش هخسر اختي عشان سي محمد بتاعكوا ده.

- يعني إيه؟

- زي مافهمتي يا نور ... قولتك مليون مره كلهم خاينين .. هيعمل زي ما ابوكي عمل

ويسيبك ويمشي ... مش هخسر اختي عشان أي حد يا نور. ونصيحة مني ما

تخسريش مريم.

- واتي هتخسريهم ليه أصلاً يا ماما؟ وأنا هخسر مريم ليه؟

- إتي أكيد عارفه إن مايسه ومريم فاكرينه جاي يتقدم لمريم وعارفه إن مريم بتحبه .. بلاش تستعطي.

بدأت نور في البكاء:

-والله ماكنت اعرف إنه جاي أصلاً والله ماكنتش عارفه حاجه وكنت بعيد عنه ...
وبعدين إتي ليه فاكرهم كلهم زي بعض ؟ أنا ذنبي إيه إنك اختارتي غلط؟!

ماجدة وصوتها يعلو:

- مش هسيك اتي كمان تختاري غلط.

انفجرت نور في البكاء، ودخلت غرفتها لتجد هاتفها يرن داخل حقيبتها، وردت بعد أن كففت دموعها، وحاولت أن يبدو صوتها طبيعياً:

- أيوه يا مريم..

ولم تكمل نور جملتها لتجد صوتاً عالياً مخلوطاً بالبكاء:

- إسمعي يا نور .. أنا واتي عارفين كويس مين فينا اللي المفروض تتجوز محمد .. أنا ماعرفش إتي ازاي عملتي كده!!

ولم تسمح مريم لنور بأي فرصة لتدافع عن نفسها:

- لو وافقتي إنك تتجوزي محمد يا نور هيبقى آخر يوم بيني وبينك.. سامعه؟

وأغلقت مريم الهاتف، ودخلت أمها الغرفة لتجدها تتنفس بصعوبة من شدة البكاء، فاحتضنتها أمها:

- ماتزعليش يا بنتي .. أكيد ربنا هيكتبك الخير والخير مش راجل وبس وبلاش تاخدي حاجه مش بتاعتك.

- بس هو بتاعي ياماما.

- لو بتاعك ربنا هيكتبهولك .. يلاً نامي وسييها على الله.

بعد انتهاء مكالمة مريم، التي لم تجد نور لها وصفاً سوى أنها مقارنة غير مُستحبة بالنسبة لها، فهي بالطبع ستختار مريم، لكن ذلك قبل أن تضع مريم نفسها في تلك المقارنة مع محمد، فهذا أوضح أن مريم إذا كانت في موقف نور كانت ستختار محمد.

قررت أن تتصل بسلمى لتفهم منها، لكن هاتفها لم يسمح لها بذلك، فمنذ بداية اليوم وهو يعمل، وجاء وقت راحته. وضعت نور هاتفها في الشاحن، وتوضأت لتصلي صلاة استخارة. ظلت تدعو الله أن يقرب لها الخير، فهي عبد ضعيف!

هي ما زالت تتألم من أبيها، رغم هجره لهم وتركها مع أمها وهي لم تكمل التاسعة ليتزوج من أخرى، وترك البلد كلها، وغالباً نسي أنه له بنتاً. تدعو الله أن يرسل لها من يعوضها عن آلام قلبها، وتدعو إن كان محمد ذلك الرجل فليقربه منها، وأن يلين قلب أمها وألا يبعدها عن مريم في كل الأحوال. وأول ما فعلته حين فرغت من صلاتها، أمسكت بهاتفها وقررت تشغيله، وأول عمل قام به الهاتف، كان استقبال اتصال جديد. خافت نور أن

يكون كآخر اتصال، لكنها حتمًا ستترد، وضغطت على زر الموافقة:

- آلو..

- أيوه يا نور أنا محمد.

ازداد خفقان قلب نور، وكادت تبكي، لا تعلم أمن الفرح أم من الخوف! لا تدري ما تقوله. راجية من الله أن يكون محتوى المكالمة يخفف عنها ذلك.

- آنا اسف إني بتصل بيكي وآسف إني أخذت رقمك من سلمى .. بس احنا لازم نتكلم.

- إنت ليه عملت كده يا محمد؟ ليه ماقولتليش؟ ليه حتى مالمحتش وكنا قررنا هنعمل إيه؟! ... أنا كده هخسر كل حاجه.

وعندما سمع صوتها كاد يبكي معها، رغم أن حديثهما منذ أن تعرفا لم يزد عن خمس دقائق في المرة، لكنه يشعر بشعور مختلف تجاهها، ولا يريد أن يكون سببًا في هذا البكاء.

- طب ممكن تهدي؟ فهميني بتعيطي ليه؟!!

- بيعيط ليه! أنا هخسر مريم يا محمد .. مريم قالتلي لو اتجوزنا مش هتكلمني تاني .. وماما موقفها غريب.

نور لم تعتد على أن تبوح بما داخلها لأحد أبدًا، لا تدري كيف قالت له ذلك! هي لم تعتد على أن تكون ضعيفة أمام أي إنسان مهما كان!

بدأ محمد يربط كلام سلمى بكلام نور، وبدأ يفهم الموقف:

- طب ممكن نتقابل لو ينفخ عشان كلام التليفون ده هيصعب الموقف؟

جفت نور دموعها، وبدأت تشعر براحة فجأة. لا تعلم

من أين أنت!

- هحاول وهعرفك.

- ماشي ماتخافيش.

ابتسمت نور، رغم ما يحمله قلبها من خوف وحزن!

نور: حاضر .. سلام.

وأغلقا الهاتف، وكل منهما يدور برأسه أفكار مشنتة، لا

يميزان بين الصواب والخطأ، لكنهما يشعران أنهما خُلقا

لبعضهما، وأن عليهما أن يتجاوزا تلك المرحلة معًا.



الفصل الثاني

(ازرع حباً تحصد سعادة)

لم تستوعب حتى الآن من أين أنتها تلك الجرأة! تحاول أن تنتقم أم تحاول إثبات ذاتها وتحقيق حلمها؟! لكن على كل حال، كان عليها أن تجد حلاً .. وساعدتها مروة على ذلك، لكن سحر كان رأيها معاكساً. رأت أن ما تفعله جنون، وأقسمت أن النتيجة لن تكون مرضية لأحد، لكنها ستخوض التجربة، فهناك حلم ينتظرها .

دبرت مروة موعداً معه .. "سالم" شاب ملامحه صعيدية، طويل ووسيم، وجهه مبهج جداً، ذو الثانية والعشرين عاماً. حاولت مروة أن تشرح له الموقف حتى لا تخرج سميحة، لكنه أراد أن يقابلها وجهاً لوجه ليفهم منها .. منها هي. اشترط أن تكون مروة معهم، كونها قرييته وصديقة سميحة في الوقت ذاته، ولم ترفض ذلك.. مروة ذوقية في كل المواقف، وفي أثناء مقابلتهم في أحد المطاعم في وسط البلد، اقترحت أن تجلس على طاولة بمفردها لتترك لهما حرية الحوار.

- مش هنتعد أكثر من ٣ شهور .. ولو الشغل عجيبك تقدر تكمل هناك أو تيجي فرع الشركه هنا .. بس إنت خريج إيه؟
- تجارة.
- طيب تمام .. عامة الشركه بتشتغل في كل المجالات تقريباً .. أنا مستنيه المؤتمر ده من سنين وشرطهم إن الموظفين يحضروا مع أزواجهم..

- معلىش .. سيبيني يومين أفكر وأظبط أموري وأشوف هقول إيه لأهلي..

تحاول أن تقنعه، فهي أول مستفيدة.

- الفرصه دي مش هتتعوض ليك أنت كمان ..هنتجوز على الورق بس .. واحنا

الاتنين هنستفيد من الشغل .. وياريت ماتعرفش حد والموضوع هيبقى كأنه

ماحصلش .. أنا عارفة إن الموقف صعب.. بس كام شهر وهيعدوا.

- ربنا يسهل إن شاء الله .. هظبط أموري وهقول لمروه ترد عليكى.

- تمام .. بس ياريت ماتأخرش عليا عشان أثبت اسمي فى القايمه.

- بإذن الله.

انتهت المقابلة بسرعة. كان خجولاً، لم يرفع نظراته عن

الأرض، يحادثنها بأدب جم، لن تقارنه بحبها الأول. لا،

لم يكن الأول. الحب الأول هو الحب الأبدي، فالحب الذي

تنتهي صلاحيته لا ينطبق عليه كلمة حب من الأساس ..

نجاها الله منه، لكنها لم تنساه بعد، ما زال يأتي في بالها

لحظات كثيرة، وأحياناً لا تستطيع أن توقف تفكيرها فيه!

مضيعة للوقت.

عليها أن تتقبل الوضع الجديد .. لا يوجد لديها خيار آخر

وإلا ستخسر كل شيء. إن لم تكن خسرتة فعلاً.

- إتي مستوعبه اتتي بتعملي ف نفسك إيه؟!!
- أعمل إيه طيب يا سحر؟ ما عنديش حل تاني.
- لا أكيد في حلول تانيه .. إتي اللي مترسه دماغك ومش شايفه غير الحل ده.
- قاصدك إيه؟
- إتي فاهمه قصدي كويس.
- المفروض يعني أضيع فرصة مستنياها من زمان عشان خاطره؟ ماهو اللي باعني من غير ما أعمله حاجه. أنا اللي كنت بعافر دائماً تعبت من المعافره .. أنا محتاجه اركز ف شغلي شويه .. سالم شكله محترم وهيقدر الاتفاق اللي بينا.
- ازاي تتقي ف واحد ماتعريفش حاجه عنه؟!!
- ما عرفش بقي يا سحر .. أهو اللي حصل وخلاص .. وبعدين مش يمكن ما يوافقش أصلاً؟
- طب لو وافق وسافرتي .. هتقولي لأهلك إيه؟
- مش هجيب سيره لحد عن موضوع الجواز أصلاً وهحضر المؤتمر وهرجع على طول وأنا اتنقت معاه على ده .. لا أنا هقول لحد ولا هو هيعرف حد .. إتي ومروه بس اللي عارفين.
- إعملي اللي إتي عايزاه .. أنا ممها اتكلمت معاكي هتنشفي دماغك برضو.
- سيديها على الله ونامي بقي صدعتيني.
- فين الهبله التالته؟



- قاعده بره بتسمع الراديو.
 - دماغ البت دي.
 - طب يلاً نام وهي شويه وهتلاقيها جت تنام معانا.
 - ماشي تصبحي على خير.
 - واتي من أهله.
- نامت كل منهن، وهي تفكر في الغد. ماذا سيحمل لهن؟!
خاصة سميحة؛ لم تتوقع كيف ستكون نتيجة كل هذا!..
أبعد كل تلك التخطيطات يرفض؟! يا الله! ..

بفستانها الأبيض تخرج من سيارة فارهة لتجده منتظرها،
فتمسك بيده ويسيران معًا. وجهها مُضيء كالقمر رغم
عتمته، مبتسمة. تجد مريم آتية بفستان أسود لتمسك بيده
الأخرى. ينظر لكلتيهما ثم يقبض على كليهما ويجذبهما
للسير، تسمع نور صوت طفل رضيع يبكي ويصرخ،
فتترك يد محمد وتسرع ناحية الطفل لتحمله وتحاول
تهديته، يبتسم لها الطفل ويغمض عينيه كأنه نام، أو ربما
مات! فترتعش يدها؛ لتجد يدًا أخرى وُضعت على كتفها،
فتنظر لتجد نسخة منها تدمع وتنظر لها في ضعف! نور
مذعورة، وتحاول أن تنطق. هذه أنا؟! .. هذه أنا؟!
تتحرك شبيهتها لتصل حيث يقف محمد ومريم، فتقف
وسطهما ليحتضنها محمد، وتضع مريم يدها على رأسها
لتطمئنها .. تشعر نور أنها تتراجع للوراء دون سيطرة
منها، تحاول أن تصرخ لتتجو. لكن دون جدوى ..

وجاء موعد اللقاء ... اختارت نور أن يتقابلا في حديقة
قريبة من مكان سكنهن، وطلب محمد أن يكون لقاؤهما
باكرًا حتى لا يتأخر عن موعد عمله.

- يمكن نتكلم وتهميني في إيه بالضبط؟!... أنا عايز أسمعك.

نور مشتتة بين أن تبوح بكل شيء ليجدا حلاً معاً، وبين أن تصمت وتنتهي الموضوع قبل أن يبدأ.

ظلت صامته بضع دقائق ثم.....

- إنت عملت كده ليه؟

- إنتي ليه بتحسسيني إني عملت جريمة وغلطت ف حقت؟ .. نور أنا طلبت إيدك

من أهلك عشان أقرب منك وربنا راضي عننا وكل أهلنا فرحانين بينا..

- أهو أهلنا مش راضيين إننا نبقي سوا.

- ليه بقي؟!!

تتهدت نور ... لا تعلم كيف توضح له الأمر.

- هي سلمى حكتهك حاجه على مريم ولأ؟

- أنا هوفر عليك الكلام اللي اتني مش قادره تقويه ... سلمى لحد ما طلبت إيدك

ماكنتش فهمتني حاجه لإنها ماكنتش فاهمه .. بس هي حست امبارح إن مريم كانت

فاكره إني جاي أطلب إيدها هي..

نور حركت رأسها موافقة.

- هو ده اللي مزعلك يعني؟

- طبعا مزعلني يا محمد .. أنا ومريم أكثر من الاخوات مش هقدر اتخلي عنها.

- هتتحل وهتشوفي .. بس المهم إنتي عايزه نبقي سوا أصلا ولأ؟

قبل أن تجيب نور، رن هاتف محمد فضحك.

- ألو .. ياريتي افكرت مليون جنيه يعني عمليتي إيه؟ ... طب اتوا جاين دلوقتي؟ ... ماتأخروش طيب عشان هتأخر على الصيدليه كده ... ماشي سلام.

وترك محمد هاتفه.

- أهي أتحت اهي.

- عملت إيه؟!

- إستي شوويه وهتفهني.

معظم الوقت كانا صامتين، ينظران لبعضهما دون تعليق، حتى وصلت سلمى، لكنها لم تكن بمفردها.

- أهم وصلوا.

تعجبت نور مما رآته! كيف فعلت سلمى ذلك؟! ماذا قالت لمريم لتجعلها تأتي معها إلى هنا؟! بدأت سلمى حواراً جديداً

- احنا جينا .. عاملين إيه؟

- إحنا تمام .. إنتوا عاملين إيه؟

- إتهدلنا ف المواصلات.

مريم ونور ظلتا تنظران إلى بعضهما حتى نطقت مريم:

- نور ممكن تقوم نتمشي شوويه؟

تحركت نور معها، لعلها تجد أي علامة توضح لها ما يحمله لها القدر! بعداً قليلاً عن الطاولة، وتركنا محمد وسلمى يمزحان معاً.



- عمليتي إيه يا ماضه ؟
- يا بني احترمني شويه مش معقول كده..
- إنجزي بدل ما اقوم واسيبك وخليكي اتتي تدفعي الحساب.
- مش معقول .. ربنا رزقني بأخ مافيش أرخم منه ... المهم أنا فهمتها إننا فعلاً ما كناش فاهمين حاجه وإن نور ما كناشش تعرف إحنا جاين ليه!
رد عليها في حماس:
- يارب المشكله دي تتحل ... ياترى مين اللي تق ف الجوازه دي؟ ياترى مين ياترى مين؟؟
- إيه انت بتبصلي كده ليه؟ ... ده أنا نفسي أخلص منك النهارده قبل بكرة .. ده انت زاحم الشقه.

- أنا آسفة .. ما كناش المفروض اتسرع فحكيمي عليكى .. ما كناش المفروض أعلق نفسي بحاجه مش هتحصل ... ماتزعلش مني.
احتضنتها نور، وأخبرتها أنها أغلى شخص في حياتها،
وآلا تضع نفسها بمقارنة كتلك مرة أخرى.
- ربنا يهنيكوا بعض يانور.
- مريم إتتي بجد مش زعلانة؟ .. يعني لو اتجوزت أنا ومحمد هتبقى مبسوطه عشاني؟
- طبعاً. إتتي هبله يابت ولأ إيه هو انا ليا غيرك؟ .. أنا فرحتي بيكي ماتتوصفش .. ده أنا هفضل طول الفرح بزغرط وبرقص ومش هتهد ... بس ممكن أسألك سؤال؟
- إسألني..

- إنتوا عرفتوا بعض ازاي وليه ماقولتيليش؟
- محمد السنه اللي فاتت كان لسه جاي يسكن جنبنا .. وسلمى كانت ماكانتش
واخده على المكان لما نقلوا كلهم هنا .. وهو كان بيوصل سلمى لأي مكان وكان بيجي
معاها الكليه كثير .. ولما اتعرفت على سلمى عرفتني عليه.. وأحيانًا كان بيوصلنا.
أعجبت بيه ف الأول .. بس كنت عارفه إن ماما هتفرض أي حد بسبب بابا فحاولت
أبعد شويه.. بس هو دايماً كان بيحاول يقرب .. مارضتش احكيك عشان ما أقنعش
نفسى بوهم .. ولما أتت حكيكلي ماكانتش متوقعه إن قاصدك عليه وأنا وسلمى أصلاً
مش قريين من بعض فماعرفش تفاصيل عنهم ولا أعرف بيشتغل فين.. حتى عنوانهم
ماعرشوش لإن بيتي قبلهم .. فكنت بنزل من العريه وهما بيكملوا الطريق.. ولما شوفناه
ف الصيدليه مارضتش أحكيك عن حاجه عشان فعلاً ماكانش في أي خطوه لا
مني ولا منه.. قولت يمكن يبجك فعلاً وكنت هفرحلكوا والله.

مريم كادت تنفجر في البكاء، لكنها ضمت نور وأخبرتها
أن كل شيء سيكون على ما يرام، وأنها بجوارها دائماً
مهما كانت العواقب.

- مش يلا نرجلهم بقي؟
- يلا.. إحنا لازم نروح عشان أنا مش قايله لماما إني مع محمد ولا قايلها إني هنا
أصلاً.

- هي خالتو عملت إيه معاكي بعد ماروحتوا من عندنا؟
- هحكيك واحنا ف الطريق عشان متأخرش.
- تمام.. يلاً.

بدأ محمد يطمئن تجاه تلك الزيجة بعد أن وجد أن الطريق ممتلئ بالصعاب، لكنه شعر أن الله سيرزقه خيرًا ..

في مساء ذات اليوم، جلس محمد يقرأ في روايته، كان يحب قراءة الروايات الرومانسية والاجتماعية، عله يتعلم كيف يتعامل مع حبيبته وزوجته المستقبلية! دائمًا يتمنى أن يكون زوجًا وأبًا مثاليًا؛ حيث إنه نجح في أن يكون ابنًا وأخًا مثاليًا .. جلس يقرأ ويفكر. ماذا سيحدث فيما بعد؟! هل القادم أجمل أم لا؟! هل ستكون حياته كما تمنها أم ستختلف؟! وقطع طرق الباب عليه تفكيره. دخل والده غرفته بعد موافقة محمد على دخوله، وكان يحمل ابتسامة تخفي آلامًا وأوجاعًا.

- في حابه يا بابا؟!

رد والده بكلام كثير لم يتوقع نهايته: بص يا بني.. إنت عارف إن أنا وأمك ماتحوزناش عن حب.. بس كنا بنتقي رينا ف بعض لحد ماكبرناكوا وبقيتوا ترفعوا الراس.. ومشاكلنا بسيطه وماكناش بنجرح بعض وانتوا شوفتوا ده بعنيكوا.. مش عارف هي عايزة تطلق ليه؟! والله أنا مزعلتهاش.. بس مادام هي مش مرتاحه أنا مش هقدر اعيش معاها غصب عنها ... أنا هعمل معاش مبكر يا بني وهروح أقعد ف البلد.. هشتغل ف الأرض بتاعتي وهتونس مع عمالك وعماتك وعيالهم.. بس معلش خليا بعد ما اطمن عليك وجوازتك تتم مع إني خايف.

- ماتخافش يا بابا كله خير بإذن الله.. إدعيلي بس ... يمكن هو ده القرار الصح ليكوا انتوا الاتنين يا بابا .. ماما بقالها فتره مكتبته وحالتها ماتسرش وأنا هحاول افهم مالها.. وماتخافش يا بابا. إحنا ولادكوا انتوا الاتنين وهنفضل جنبكوا...

شعر محمد أن والده يريد أن يبكي، لكنه يتماسك أمامه، فحاول والده ألا يُظهر ذلك، فخرج من غرفته مُسرِعًا بحجة أنه تأخر عن أداء الصلاة، لكنه حين فتح الباب، وجد زوجته ووالدة محمد وسلمى واقفة خلف الباب تسمع الحوار الذي دار بينهما وتبكي .. تبكي كثيرًا.

ضمها إليه، وطلب منها أن تمسح دموعها دون أن يسألها عن سبب بكائها وتصلي معه في جماعة، وطلب من محمد وسلمى الطلب ذاته، هو يعلم جيدًا أن طلبها في الانفصال قرار متسرع منها في لحظة غضب.



الفصل الثالث
(أهم خطوة هي الأولى)

- يا أمي أنا ماصدقت لقيت شغل .. وبعدين دول ٣ شهور بالكثير إن شاء الله.
- وانت لقيت الشغل ده فين؟
- مروه جابتهولي تبع الشغل بتاعها.
- مش عارفه يا بني.. أنا مش مرتاحه.. بس مادام إنت عايز تروح روح يا حبيبي وربنا يجعلها فتحة خير عليك وينورك طريقك يارب.
- يارب يا أمي.. إدعيلي كثير الفتره الجايه.. أنا محتاج دعواتك.
- إنت هتخوفني عليك ليه بس!؟
- مش بقولك كده عشان تخافي والله.
- طيب هتسافر إمتي؟
- هفهم من مروه وهقولك إن شاء الله .. المهم كت عايز نروح نقرا فاتحه مع أهل سميره.
- لأ بلاش نروح قبل ماتلاقي شغل .. هنروح نقول للناس إيه؟.. جاين نحجزها؟
- طيب نعمل إيه؟
- مانعملش حاجه .. إتوكل على الله وربنا يقدمك الخير.
- يارب .. يارب.

تدخل الشركة التي تعمل بها و بكل ثقة.. عيناها تملؤهما نظرة انتصار، لكن الموقف لا يستحق كل هذا.. دائماً

تعطي الأمور أكبر من حجمها بكثير. وصلت مكتب مديرها، وعلمت من مساعدته أنه ينتظرها بالداخل وسمحت لها بالدخول.

هذه المرة بدأت هي بالحوار:

- صباح الخير يا أستاذ مدحت.
- صباح النور يا سميحه. مبروك عليكى المؤتمر.
- الله يبارك ف حضرتك يافندم.
- إجمزي للسفر.
- إمتى؟
- الأسبوع الجاي.
- طيب ممكن حضرتك تقولي على تفاصيل شغل جوزي؟
- ماتخافيش.. هيبقى معاكوا ناس تبعنا هناك من أول ماتوصلوا المطار هناك لحد ما ترجعي مصر تاني.
- تمام يافندم.
- عايزك تشرفينا وتظهري كل أفكارك ف المؤتمر ده .. موظفين كتير نفسهم بيتقى عندهم فرصتك دي.
- بإذن الله.. بس أستاذن حضرتك ف إجازة يومين أجهز حاجتي للسفر وأسافر أسلم على أهلي.

- ما فيش مشكله.. بس حاولي تخلصي حاجتك بسرعه عشان هقولك على كام حاجه تخلصيم قبل السفر عشان في شوية ورق هنتحاجه معانا.
- تمام .. مش عارفه أشكر حضرتك إزاي.
- من غير شكر إتي تستحقي ده.
- أخيرًا يشعر أحد بحبها لعملها، ويشعر بشغفها الزائد. الآن يجب عليها أن تكون مطمئنة حتى ولو قليلاً. سالم وافق على اقتراحها وأقنع أهله بالسفر. ليس ذلك فقط، بل عقدا القرآن أول أمس، وصديقه شهدا عليه، وكانت مروة وسحر بجانبها. ظلت مروة تؤكد لها إنه يستحق تلك الثقة عن جدارة. كانت تشكرها لمساندتها لهم، بالرغم من أن سميحة هي من عليها الشكر.
- سافرت وأخبرت أهلها بخبر سفرها، رفض والدها في البداية، فهي عزباء، ومجتمعها لن يقبل بسفرها بمفردها حتى إذا كانت ستتولى رئاسة الجمهورية.. وافق بعد إلحاح وبعد ما شرحت له تفاصيل السفر وأنها لن تكون بمفردها، سيكون معها زميلات العمل . حاولت إقناعه أن وجودها في مصر أخطر من وجودها في أي مكان آخر، لكن لا حياة لمن تنادي .. الصعيدي صعيدي!
- لم ترَ سالم منذ عقد القران.. لأول مرة ترى رجلاً مثله. مؤكداً أن حبيبته تحبه كثيراً، فهو لم يقبل باقتراح سميحة إلا لأنه يحبها. فذلك كله من أجلها أولاً وآخرًا.



أوصيت رفيقاتيها بأن يطمئنا علي أهلها كل يومين على الأقل، وأن يرسلن لهم هدايا، على أنها هي من أرسلتها. ووافقا لإسعادها. لآخر لحظة سحر تؤنّبها على ما فعلت! لكنها ستتحمل نتيجة قرارها مهما كانت العواقب..

سافرا.. سالم يكاد يكون لا ينطق، كلامه محدود ومتزن جدًّا، يربكه الموقف ويربكه قربها منه! عليهما أن يبدوا زوجين طبيعيين حتى لا تسمح لأحد أن يشك بأمرهما.. فعلاً كان معهما موظف منذ بداية. تحركا من مطار القاهرة وحتى مطار بيروت، وآخر ظل معهما حتى أوصلهما للمنزل الذي خصصته لهما الشركة ليقوما فيه، وبدأ يشرح لهما الوضع:

- هتقعّدوا هنا ف البرج ده.. كله موظفين من شركات كثير جاين يحضروا المؤتمر. لو احتاجتوا أي حاجة هتلاقوني ف الدور اللي فوقكوا.
- شكرا جدًّا تعبنا حضرتك معنا.
- ماتقولش كده يا أستاذ سالم إحنا ف الخدمه.
- ربنا يخليك.
- أستاذن أنا.
- إتشرفت بمعرفتك.
- وأنا كمان.. مع السلامه.
- مع السلامه.

غادر الموظف، ولأول مرة يكونان هي وهو بمفردهما، أفرغت الأغراض في أماكنها، وبقيت في الغرفة، الشقة بغرفة واحدة، أخبرها أنه سيبقيت في الصالة، وألا تقلق من وجوده معها. تعاهدا أن يكونا أخوين، فهو إنسان يشرف أي أحد بمعرفته له، مثال للرجل حقًا، بدأ عمله قبلها، وقدم طلبًا بأن يعمل في وظيفتين، منه تكون على راحتها، ومنه يحقق حلمه. أي حوار بينهما يؤكد لها مدى حبه لها.. ليت من أحببته سميحة كان يحبها نصف ما يحبه سالم لسميرة! يذكر اسمها كل دقيقة تقريبًا حتى حفظته عن ظهر قلب.

تتشغل هي بين الأوراق والأبحاث والملفات.. بينها وبين حلمها أقل من خطوة، كانت حمقاء حين أحببت غيبًا. لن تقبل أن تكرر غلطتها ثانية وتفترط في فرصة مؤتمر يحضره الآلاف من أصحاب الشركات العالمية. وإذا أحسنت عرض أبحاثها، ستصل لمكانة باتت تحلم بها أعوامًا. كانت تعمل كأنها لم تعمل من قبل، يغلبها النوم أثناء انهماكها في عملها، وفي يوم مآ يأتي هو ليجدها مستلقية على الأرض وبيدها الأوراق والملفات تحيطها ويحاول أن يوقظها.

- سميحة.. سميحة إصحي.

انتفضت حين سمعت اسمي .. منذ فترة لم أسمع صوتاً
ذكورياً يوقظني!

- إيه ده؟ هي الساعة كام؟!
- الساعة ١١
- أنا آسفه.. نمت وأنا بشتغل ونسيت أحضر الأكل. هقوم أحضره حالاً.
- لا لا مش مشكله أنا مش جعان.. أنا بس عايز أنام عشان عندي شغل بدري.
- طيب عشر دقائق بس ألم حاجتي أدخلها الأوضه جوه.
- تحبي أساعدك؟
- لا شكراً أنا هلمهم على طول أهو.
- طيب أنا هتوضا وأصلي عقبال ماتخلصي.
- ماشي.
- لو تحبي تيجي نصلي جماعه؟

بدت كالصنم! سمعت جملته وكاد كل شيء جمعته يقع
من يدها! كيف لها أن ترفض طلباً كهذا؟! وافقت بالطبع،
ووقفت خلفه ليكون إمامها، فوجئت بصوته وهو يقرأ
القرآن. صوته يجعلك تدخل في حالة خشوع وروحانية
رائعة! انسابت دموعها وهي تسمعه وهو يجيد التلاوة، لم
تحاول أن تسيطر عليها، فقد سيطرت بما يكفي من قبل!

انهمرت منها رغباً عنها حتى أنها صلاتهما ليجد
الدموع تغطي وجهها ولونه قد اصفر! لم يفهم ماذا حدث!

- مالك يا سميحه؟

- لا مافيش.

قامت لتهرب من سؤاله، فوجدته يغير اتجاه الحديث.

- طب ممكن لو ماوراكيش حاجه تعملينا كوبايتين شاي وتقعده ف البلكونه
شويه؟

- حاضر.

خرجت وهي تمسح دموعها التي لا تعلم سببها الحقيقي!
لكنها من شدة الألم ، بل الآلام، تحملت كثيراً حتى
انطفأت روحها، وجاء هو ليحييها بصوته.

* في البلكونة *

- تسلم إيدك.

- على إيه؟ أنا ما عملتش حاجه .. لسه مش راضي أجيبك حاجه تاكلها؟

- لا ماليش نفس.

- ليه بس؟

- سميره اتخطبت.

- إيه؟!!

- كلمت أمي أظمن عليها لقيتها بتقولي إنهم خطبوها لابن عمها.

- ازاي يعني؟

- اهو اللي حصل بقي.

- عايز ترجعلها مصر؟

- هرجع دلوقتي أعمل إيه؟.. أنا عارف إنها بتحبني ووافققت غضب عنها.. بس لو رجعت وأنا ماعيش ولا مليم مش هغير حاجه.

تعلم جيداً أن حديثه هذا لم يكن هيئاً عليه أبداً.. حب حياته تتخلى عنه - كما حدث معها- خاضت تلك التجربة من قبل وتعلم ما يشعر به.

- يلا أنا هقوم.. أنا م آسف لو صدعتك.

- إحنا اخوات .. ربنا يعوضك ويخفف عنك.

- آمين يارب.. عايزه تقولي حاجه؟

كيف عرف أنني أريد أن أخبره قصتي؟! هل يبدو عليّ ذلك؟! جاوبته بسرعة حتى لا أبدو مترددة:

- لا.. تصح على خير. أنا كان هقوم انام.

- وإتي من أهله.

وتركته ليرتاح ودخلت غرفتها. أمسكت بمفكرتها وغرقت فيها، لا تستطيع التوقف عن الكتابة طالما كانت بيدها. للمرة الثانية يغلبها النوم وهي بين الأوراق. هل

ستبقى هكذا طوال عمرها أم سيأتي يوم تكره فيه الورق هذا؟!!

حب العشرة أبقى أم حب من أول نظرة؟! اثنان لا يعرفان عن بعضهما شيئاً سوى بيانات تُكتب في شهادة الميلاد، أو ربما البطاقة الشخصية، ويعيشان معاً على الحلوة والمرّة، يعيشان حياة بأكملها معاً، متقبلين بعضهما، يتعاملان أمام الجميع كأنهما عاشا قصة حب دامت لسنين ولسنين! .. أم اثنان رأيا بعضهما صدفة دون أي ترتيب؟! يواجهان مشاكل، لا يعلمان من أين أتت! لا يعلمان سبب مواجهتهما لها! ليس لديهما ما يتمسكان به من أجله بعد. لا وقت، ولا وعود، ولا أسرة... ولا شيء. لكنهما أرادا أن يبقيا معاً هكذا. ربما الاثنان أبقى، وربما النهاية لكليهما قريبة ... قريبة جداً.

يوم جديد ... يوم يرسم بداية حياة نور ومحمد معاً.

- صباح الخير يا ماما.

- صباح النور يا نور.

- ماما.. بعد إذنك أنا عايزة أتكلم معاكي ف موضوع.

- أنا عارفه اتتي عايزه تتكلمي ف إيه.. وأنا كمان عايزه أتكلم معاكي ف نفس الموضوع.

شعرت نور بالخوف بعد جملة ماجدة، ظنت أنها ستحسم الأمر وستجبرها أن تختفي من حياة محمد نهائياً.

هل سأكل جامعتي؟! ... ماذا تريد أمي؟! ... يارب خيب ظني هذه المرة.

- أنا فعلاً ماكانش ينفع أقارن حياتك بحياتي يا نور ... أنا بس خايفه عليكي .. أنا موافقة على محمد يا نور..

نور لم تجد كلمة تعبر بها عن صدمتها في رد أمها! هل ما سمعته حقيقة أم وهم؟!!

- بجد؟!!

- مايسه كلمتني وقالتي إن مريم مش بتفكر فيه وإنما ما عندهاش سبب تخسرنى عشانه .. ما فيش سبب يخليني أرفض .. بس بشرط .. يجي يتقدم هنا ف البيت عندنا وأنا اللي أحدد فترة الخطوبه.

- أي شرط هنوافق عليه .. هاتي بوسه بقى .. أنا هروح أكلم محمد أقوله يجي إمتى.

- آخر الأسبوع إن شاء الله.

- هيسيبه أنا بجبك أوي يا ماما.

أفنع محمد والديه بأن يتقدما معه مرة أخرى لطلب يد نور من والدتها، ووافقت ماجدة على طلبهم، وقرأوا الفاتحة، وحددت ماجدة موعد الخطبة ... بعد أسبوعين ... أن تكون ستة أشهر على الأقل حتى تطمئن على نور مع محمد. ولتكون فترة كافية للتعارف .. والغريب أنها لم تثقل على أهل محمد في مطالبها! أخبرها محمد أنه

سيفعل ما بوسعه ليجعل نور سعيدة، وأخبرها أنه تمكن في فترة عمله منذ بداية دراسته في الجامعة أن يوفر مبلغًا كافيًا لشراء شقة ليعيشا فيها، وأنهما سيتعاونان في تجهيزها.

وجاء موعد الخطبة سريعًا ... الموعد المنتظر، ليشهد الجميع على قصة نور ومحمد معًا منذ بدايتها.

- سلمى.. معلش إطلعي شو في نور خلصت ولأ.. إحنا بقالنا ساعة واقفين.. دي لو بتعملها عملية تجميل كان زمنها خلصت.

- هههههههههه أنا مش عارفه هي وافقت عليك ازاي أصلًا.

- طب اطلعي واتي حلوه كده شو فيها.

- محمد إنت كويس! .. إنت أول مرة تشكر ف شكلي!

- لأ. ده عشان أنا اللي دافع فلوس الفستان بس.

- طب شوف مين اللي هيطلعك بقى.

أوقف والدهما هذا الشجار:

- خلاص يالمض انت وهي أنا هطلع أنا.

محمد مازحًا:

- تطلع تعمل إيه يا حاج؟ .. دي عروستي انا حضرتك.

ضحك والده، ثم رد عليه وهو يضع يده على كتف محمد:

- نور من النهارده بنتي وأنا زي ابوها .. لازم اسلمها لك بإيدي عشان تبقى مطمئن ..

أكد هي نفسها أبوها بيتي ساندها ف يوم زي ده.

دائمًا ينبهر محمد بكلام والده، يلقيه بالرجل العظيم.

- ربنا مايحرمناش منك يا حاج.

وبعد دقائق، وجد محمد والده ممسكًا بيد نور. أهذه نور حقًا؟! لأول مرة يراها بفستان. فدائمًا ما ترتدي البنطال. لأول مرة يراها تضع أي نوع من مستحضرات التجميل وهي لا تحتاج لأي منها في الأساس، لكنها تبدو كالأميرة هذه المرة، جميلة هي، جميلة جدًا، تنزل على السلم ببطء، فهو يعلم أنها لا تتحمل الكعب دقيقتين.. أمها، وخالتها، ومريم، يزغردن بجوارها، شعرت سلمى أن محمد يقف كالصنم لا يتحرك.

- إيه ياعم صحصح .. روح إمسك إيد عروستك.

تقدم محمد حتى وصل لنهاية السلم، ووضع والده يد نور في يد محمد.

- إحم إحم!.. لو سمحتي أنا عروستي فوق ممكن تندهيها؟

نور سحبت يدها من يده: إنت رخم أوي على فكره.

ضحك محمد وأمسك بيدها ثانية:

- أنا آسف أنا آسف ... إتي زي القمر على فكره.

سحبت نور نظراتها في خجل وابتسمت.

قَبِلَ محمد يدها، وظل مُمسكًا بها طوال الحفل، لم يتركها لوهلة، وهي كانت سعيدة جدًا بذلك.

رغم عدم اطمئنان ماجدة على ابنتها الوحيدة، لكنها كانت سعيدة، ابنتها كبرت، وستصبح زوجة ثم أمًا، ستشعر مع ابنتها المستقبلية بما شعرته هي مع نور نفسها. ظلت تدعو طوال الحفل أن يكون نصيب نور أفضل من نصيبها الذي ظل يعاندها ولم يقف بصفها أبدًا. أسيكون محمد كزوجها؟! هل سيخون؟ يكذب؟! يهرب؟! أم سيكون مختلفًا عنه؟! هل سيكون قدر ابنتها لا يشبه قدرها هي مطلقًا؟ تتمني ذلك. فلا توجد هناك أم تتمنى لابنتها الأذى على وجه البسيطة... تلك هي فطرتهن.

لتأتي مایسة لتخفف عنها تلك الذكريات التي كانت دائمًا ما تطاردها.

- الحلو سرحان ف إيه؟

ابتسمت ماجدة وضمت أختها: إتي اللي طلعت بيها من الدنيا يا مایسه .. ونعم الأخت والصاحبه وكل حاجه.

- ربنا يخلينا لبعض يا ماجده.

- أمال مريم فين؟

- مريم ياستي ماقعدتش عشر دقائق من أول اليوم وهي بتزغرت وبتزغرت وفرحانه بنور وطايره من الفرحة كمان.

- يارب تكون بتعمل كده من الفرحة مش الحزن.

- ماتخافيش على مريم ... هي عارفه إنه مش من نصيبها ولما كلمتها قالتلي إنها محتاجه تركز ف دراستها وتنجح فيها ونفسها تحقق اللي أبوها الله يرحمه كان نفسه فيه .. وهي بتحب نور زي أختها وأكثر وفرحة نور من فرحة مريم بالظبط.

تنظر لابنها وهي لا تصدق! أبعد كل ذلك العذاب محمد يولد ويكبر ويدرس، ويتخرج ويصبح طبيبًا صيدليًا والآن يتزوج؟! يتزوج من فتاة أحبها وهي تحبه؟! لن تكون بداية حياته كبداية حياتها، سيكون سعيدًا أكثر منها، رغم أنها تزوجت زواج (صالونات) كما يُقال عنه، إلا أنه كان يُحسن معاملتها كأنه أحبها عمره كله وهي لا تنكر هذا أبدًا. أحبته مع الوقت، لكن هنيئًا لنور. ستتزوج بمن تحب، وهو أيضًا يحبها وهي موقنة أنه سيعاملها كما يجب أن يكون. سيعاملها بحب، ليس لمجرد أداء واجب زوج كما فعل زوجها. نظرت لزوجها وهو يضحك مع ابنتهما سلمى وتبدو عليه الفرحة

. لماذا أترك رجلًا بتلك الطيبة؟! لم يضرني، ولم يهيني، رغم علمه بظروفي لم يجرحني، لا يترك فرضًا، قره من الله جعل في وجهه نورًا، نورًا يطمئنها حين تراه. كيف أكون بهذا الظلم؟! لهذه الدرجة أنا قاسية؟! لهذه الدرجة لا أقدر نعمة الله علي؟!!

حتى جاءت سلمى بعد أن بحثت عنها:

- اللي واخذ عقلك يا جميل..

حاولت أن تجد مفرًا من الإجابة على سؤال ابنتها: عتالك

يا سلمى.. نفسي أفرح بيكي اتتي كان.

سلمى بمرحها المعتاد:

- قريب ماتقليش.

- هقول لابوكي.

- بابا ده راجل عسليه أصلًا.. هتلاقيه يقول خليه ياخدك بشنطة هدمك.. إنتوا

زهقانين مني أصلًا.

- بصراحه مصدعانا ليل نهار.

- مش بقولك؟

- أهى نور ومحمد اتخطبوا.. مش هتفهمني بقى المشكله كانت فين؟

- إتتي شاغله بالك ليه؟ .. محمد مبسوط وهيتجوز بنت بيحبها والكل فرحان ليهم.

- رينا يهنيهم يارب.

كانت حفلة صغيرة، لم يحضرها سوى الأقارب، وأغلبهم من البلد، حيث ولد كلٌّ من نور ومحمد، لم يخل الحفل من انتقادهم لشكل نور، وكيف قبلت بخاتم ولم تصر على شبكة قيمة! فأمثالهم لا يعرفون قيمة الخاتم! وبالنسبه لنور حتى إذا كان صفيحًا، فهو من محمد وذلك يكفي.

قررت نور ألا تعلن عن خطبتها في الجامعة، جميع أصدقائها وأصدقاء مريم يعلمون الكثير عن فتى أحلام مريم - سابقًا - وذلك لن يكون في صالح أحد منهم.

اتفقت مع مريم وسلمى ألا يخبرا أحدًا عن خطبتها
بمحمد، أو على الأقل بدون تفاصيل.
اعترضت مريم في البداية، هذا ليس عدلاً! كيف تتم
الخطبة خفية؟ أين الخطبة إذن؟ لكن نور لم تسمح لها
بالاعتراض. وافقت مريم إرضاءً لنور ليس أكثر.
ماذا عن رأي محمد؟!



الفصل الرابع
(قرارك و عليك تحمل عواقبه)



يومها روتيني بحت، لا تقوم بعمل أي شيء جديد. من السكن للندوات، ومنها إلى السكن، وهو أيضًا ينتهي يومه عند عودته من عمله، يعود مرهقًا لا يريد سوى أن ينام، حتى أنه ينسى أن يأكل طوال اليوم حتى اليوم التالي .. اعتادت العيش معه، ما يحمله قلبها نحوه ليس حبًّا أبدًا، بل هو فقط اطمئنان، فكما تعاهدا، فهما أخوان، وهو نعم الأخ حقيقة!

كانت تُرتب الشقة، فقد امتلأت بأوراقهم وملفات العمل. سمعت صوت الباب يُفتح ويُغلق. صراحة انتابها الفزع، ما زالوا في منتصف اليوم، وهو لا يعود في ذلك الوقت أبدًا. لكن تفكيرها لم يستمر طويلًا، فقد سمعت صوته يناديها، ولكن نبرته لم تكن كالمعتاد:

- سمحه ... سمحه.

خرجت وهي تركض لتفهم ماذا يجري!

- أيوه أيوه في إيه؟

أمسك بمعصمها، وكادت يدها تلتوي أو تُكسر في يده.

- إتي كلمتي سميره من ورايا؟

لسانها توقف .. لم تتمكن من أن تنطق بكلمة.

- ماتردي .. كلمتها من ورايا؟

حاولت أن تفلت يدها من يده وأنا تجيبه، لكن محاولاتها
قد باتت بالفشل.

- أيوه كلمتها فيها إيه؟

- إتي مين سمحك تكلمها أصلاً؟ وتكلمها ليه؟

كانت نبرته تعلقو شيئاً فشيئاً، حتى لاحظ أنها ترتجف.

- أنا كنت بجاول أحل مشكلتكوا..

- وحضرتك حلتها ازاي ان شاء الله؟

نبرته ملأتها السخرية، لا تفهم.. أكانت سخرية أم إهانة
لها؟!!

- قولتها إنك بتحبها.

- وهي كانت مستنياكي انتي تقوليلها المعلومه الفضيحه دي؟

- يعني إيه؟!!

- يعني حضرتك بوظتي الدنيا أكثر ماهي بايظه.

- بوظتها ازاي؟

- إتي عملي اللي ف دماغك وبعدين تسألني ازاي؟! أنا راجع مصر ف أول
طياره.

- طب واتفاقنا؟

- مايفيش اتفاقات بنا من دلوقتي.



قال جملته وخرج، ووجهه يظهر عليه الغضب، مؤكد أن كل من يراه سيلاحظ هذا. ماذا عليها أن تفعل الآن؟ كل شيء سينتهي هكذا؟! لماذا أي حلم تتعلق به لا يكتمل؟ تعبها طوال تلك الفترة سيكون سراباً؟!!

حاولت أن تهدأ وتتماسك، انتظرت في الشرفة حتى يأتي لتفهمه الحقيقة، لكنه لم يأت. أيعقل أن يكون قد سافر بدون أغراضه؟! يأتي الفجر وهو لم يصل بعد، فتوضأت وصلت، ودعت الله أن ييسر لها طريقها. لم تكن مخيرة في أي شيء من قبل. هذا أول قرار تأخذه بمفردها.

مر أسبوع وهو لم يظهر بعد، لا تعلم عنه أي شيء، لا تعلم حتى إن كان ما زال في لبنان أم عاد إلى مصر! تنتظره طوال الليل في البرد لتستقبله لتروي له ما حدث بالتفصيل، لكن النتيجة هي أن الحمى قد اصابتها، فقدت القدرة على الحركة حتى لو كانت بسيطة. تزداد درجة حرارتها وهي لا تستطيع إسعاف نفسها. بلد غريبة عليها، تتحرك فيها بسيارة الشركة ومعها سائق يحفظ كل شبر فيها، والآن هي بمفردها، حتى النهوض من الفراش تستصعبه.

* أول يوم دراسة الفصل الثاني *

- يا محمد مش لازم توصلنا النهارده.. فين المشكلة يعني؟

- نور أنا وافقت إنكوا تحبوا موضوع الخطوبه ده مع إني مش مقتنع أصلاً عشان أرضيكي.. مش فاهم مش عايزاني أوصلكوا ليه؟ مانا كنت بوصلكوا قبل الخطوبه. وبعدين إحنا مش عاملين جريمه.. كده كده كل حاجه هتتعرف بس أنا مش عايز أزعلك.

- طيب كل حاجه تتعرف ف وقتها ده مش وقتها يا محمد.

محمد لأول مرة تعلقو نبرة صوته هكذا:

- طيب يا نور.. إنتي حرة.. أنا نازل اشوف شغلي.

شعر محمد أن صوته لم يكن مناسباً لتهدة الجدل، بل زاد من غضب نور، فحاول أن يخفض نبرته: خدي بالك من نفسك.

- حاضر سلام.

- سلام.

وترك محمد هاتفه على مكتبه ونظر لأخته:

- مش فاهم هي عايزه تعمل كده ليه؟!

- بصراحه يا محمد هي معاها حق ... أنا لو مكان مريم وواحد قريبتى أو صحبتى اتخطبت لواحد أنا معجبه بيه وصحابي كلهم عارفين هبقي مكسوفه عيني تيجي ف عينهم.. هيبقي شكلي وحش جداً.

- ازاي كل صحابكوا عارفين واتي ماكتيش واخده بالك؟

سلمى نظرت أرضاً ولم ترد.

- سكتي ليه؟... سلمى هو اتتي كتي عارفه؟

- آه يا محمد كنت عارفه.. أحياناً مريم كانت بتلمح وأنا كنت بعمل هبله عشان عارفه إنك بتحب نور .. مآكنش عندي حل تآني .. لو كنت قولتلك أو قولت لأي حد موضوعك إنت ونور مآكنش هيتم .. مريم مآكنتش بتقول آآه صريحه أودامي ومآكنتش بتقول إسمك.. كل اللي بتقوله إنها معجبه بآبن آلجيران.. وكانت بتتكلم بهزار وآنآ اعتبرتها هزار..

نظر لها محمد نظرة لوم وعتآب لم ترها منه من قبل، ولم تتمم أن تراها.
- حرام عليكي يا سلمى .. حرام عليكي..

وتركها محمد وآآدر إلى عمله وهو يستشيط غضباً!
كيف لآخته أن تفعل به كذلك؟! على الأقل كان عليها توضيح الموقف حتى يجد حلاً مناسباً، لكنها تركته لآخر لحظة، وربما لأبعد من ذلك. كان حوارهم مع سلمى يدور في رأسه كفيلم بدون فوآصل، الكلام يتكرر في ذهنه، حتى وصل إلى الصيدلية.
- صآآب آلخير يا حسن.

حسن صديق محمد المقرب، كان زميله منذ درآستها في الكلية حتى أصبحآ أصدقاءً مقربين حتى الآن، هو من سآند محمد ليجد له عملاً في تلك الصيدلية الصغيرة. هو الوحيد الذي قبلت نور أن يحضر خطبتها.

- صآآب النور .. إيه يآع؟ مآلك آآي قرآن كده ليه؟



- لا عادي تمام مافيش حاجه.

- على ابو علي برضو؟.. اتخاقت مع نور ولأيه؟

محمد حاول أن يبدو منشغلاً:

-حاجه زي كده.

- حاجه زي كده ازاي يعني؟!

- مافيش حاجه يا حسن خلاص.

- أنا عارف إنك مش بتحب تدخل حد ف حياتك.. بس انت أكيد عارف إني مش

بسأل فضول.. أنا بس عايز أخفف عنك.

- أنا آسف يا حسن.. بس أنا فعلاً مش قصدي حاجه.

- وأنا عارف ... بص يا محمد.. أنا آه مارتبطش قبل كده.. بس اقدر أقولك إن

البنات دايماً عندهم وجهة نظر مقنعه بس احنا بنعرف ده متأخر.

اكتفى محمد بأن يبتسم، واعتبرها علامة تؤيد رأي نور

بخصوص إعلان الخطبة.

لكن ماذا عن سلمى؟! هو يشعر أنها ارتكبت خطأ لا

يغتنفر. كيف تخفي عليه أمراً كهذا؟! هو في حيرة!

يشكرها لأنها حملت عبء إعجاب مريم به بمفردها بدلاً

منه طوال تلك الفترة؟! أم يلومها لأنها لم توضح له حقيقة

الوضع منذ البداية مما زاد الأمور تعقيداً؟!!

ثم أردف على ابتسامته:

-ربنا كريم.

مريم تنتظر نور عند بنائيتها منذ دقائق.



- إيه يابنتي اتاخرتي كده ليه؟ مالكووا النهارده؟
- معلش يا مريم وقتك كثير..أمال فين سلمى؟
- كلمتها ياستي لقيت صوتها مش مطبوط وشكلها متضايقه وقالتي إنها مش عايزه تحضر النهارده.. هو في حاجه يا نور؟
- لا مافيش حاجه؟

شعرت مريم أنها أصبحت كالغريبة بينهما، لا أحد يخبرها بشيء، وتظل تصرفاتهما غامضة بالنسبة لها، وتأكدت من شعورها حين ظلت نور صامتة طوال الطريق، لا تعلم مريم إن كان من حقها التدخل أم لا! لكنها تفضل أن تبقى بعيدة حتى يطلب منها أحد المساعدة.

غادر محمد من عمله مبكرًا عن مواعده، يؤمن بأن سرعة التسامح تتناسب طرديًا مع زيادة الحب، وأخبر نور أنه ينتظرها في مول قريب من جامعتها ليتناقشا في الحل، وحاولت أن تجد مفرًا من مريم، فطلبت منها أن تسبقها إلى المنزل ووافقت، ولم تحاول أن تفهم السبب، قررت أن تظل مُهمشة.

ظلت مريم تحدث نفسها طوال الطريق: ازاي قالتلي إنها مش عايزه تخسرني وهي مشغوله عني طول الوقت؟! أنا عارفه إنها عندها أولويات.. بس

ازاي اتغيرت فجأة كده؟!.. هي مش واخده بالها إني كنت بجهه؟!.. لا يا مريم
ماتفكريش كده .. ماتفكريش كده ... ركزي ف دراستك وف اللي جاي.

- أنا مستينيكي على باب المول.. يلاً عشان متأخرش.

- خلاص أنا وصلت وشايفاك اهو.. إقفل بقى عشان الموبايل هيفصل.

ترك محمد الهاتف بعد أن أنهى المكالمة ووضع هاتفه في
جيبه وهو يبتسم، وينظر لها ويضع يده الأخرى خلفه
كأنه يمسك شيئاً لا يريد أن تراه، وحين وقفت أمامه
زادت ابتسامته، وأخرج يده لتجده يمنحها باقة ورد.. ورد
بنفسجي كما تحب . كادت تنادي جميع المارة لتبثهم
فرحتها بتلك الباقة. فرحتها بمحمد! دائماً يحاول إسعادها،
دائماً يجيد ذلك.

- عرفت منين إني بحب الورد ده؟!

- الفيس مش سايب حد ف حاله .. ها تحبي تاكلي إيه؟

- أي حاجه معاك هحبها.

محمد وهو يضحك:

- واضح إن الورد مفعوله قوي زي مايقولوا.

- جداً.

- طب يلا ناكل عشان بعد كده هلففك معايا شويه نجيب حاجات.

- ماشي يا سيدي طلباتك النهارده أوامر.

اختار محمد مطعمًا هادئًا داخل المول، وتركته نور
يختار طعامهما، كانت في عالم آخر، عالم سعيد، حتى
بدأ محمد المناقشة التي أتى بها من أجلها.

- فهميني.. إيه وجهة نظرك؟ إتي عايزانا نخبي ليه؟

- إنت فاكرا انا مبسوطه كده؟ هو انا مش زي أي بنت نفسي أقول لصحابي كلهم
إني اتخطبت؟ ... مش هينفع يا محمد.. أنا مش عايزه أرح شعور مريم ... ممكن

تستحملني ف الموضوع ده لإني مش هغير رأيي فيه؟

- طيب زي ماتحبي .. مادام دي حاجه مريحكي بيتي مريحاني أنا كمان.

- في حاجه كمان هنتعب فيها.

- إيه هي؟

- ماما ... رأيها ف جوازنا متقلب جدًا وهنتعبنا شويه وخصوصًا إني لسه ماخلصتش
دراسه.

- سيبها على الله يا نور .. ماحدث عارف بكره في إيه.. ماتخافيش كل حاجه
هتتحل واحنا سوا.

- إنت بتجيب كل التفاؤل والهدوء ده منين؟

- طول ماتني متوكله على ربنا هتبقى هاديه ومتفائله.

تشعر نور بطمأنينة تجاه أي كلمة ينطقها محمد، لا تعلم
من أين تأتيها تلك الراحة!

قرر محمد إصلاح كل ما أفسده اليوم.. أوصل نور إلى
منزلها ثم غادر إلى منزله.. دخل شقته، لكنها صامته
كأنما لا يعيش بها أحد.



فرجع نبرة صوته ليسمعه كل من في البيت:

- إيه يا جماعة.. إنتوا هربتوا ولا إيه؟

جاء صوت والدته من بعيد: تعالى يامحمد أنا ف الأوضه.

اتجه محمد إلى الصوت ليجد والدته مستلقية على فراشها.

- إيه ياست الكل.. داخله أوضتك بدري ليه؟

لترد على سؤاله في حسرة: زهقت من القاعده لوحدي بره .. أبوك سافر البلد من بدري وأختك ماخرجتش من أوضتها من الصبح..

ماراحتش الجامعه النهارده... إيه الشنط اللي معاك دي؟

منحها واحدة منها، وأخبرها أنها لها، لتجد بها عباءة أنيقة، احتضنته من فرحتها. منذ زمن لم تأت لها هدية بدون مناسبة أو بمناسبة.

- مبروك عليك يا ست الكل .. أنا هروح انام بقى عشان ورايا حاجات كثير بكرة.. ماتعريفش بابا هيرجع إمتي؟ .. عايز أكلمو ف موضعكوا.

ردت في لهفة:

- لا استنى ماتكلمش معاه دلوقتي .. استنى لما أنا اقولك.

لم يفهم محمد تردد والدته، لكنه وافقها وغادر غرفتها متجهاً لغرفته.

حين سمعت سلمى محمد وهو يغلق باب غرفته، قررت أن تذهب إليه كي تنهي خلافهما، فهي لم تعتد أن تتركه ينام وبقلبه حزن .. دائماً تخبره:

- نام وقلبك صافي وبالك رايق .. وحاول تحل أي مشكله قابلتك طول اليوم عشان تعرف تكمل اليوم اللي بعده والصبح يحلها ألف حلال.

دخلت غرفته بعد أن طرقت الباب، وسمعت موافقته على الدخول .. وجدته يضع أغراضه في مكانها، لكنه ظل واقفاً بظهره لم ينظر لها بعد، حتى سمع صوت بكائها.. استدار ليرى وجهها تغطيه الدموع، فاقترب منها ووقف أمامها:

- إيه يا سلمى؟ عامله ف نفسك كده ليه؟

ألقت بنفسها ليضمها، وحاولت مصالحته، رغم صوتها الذي أخفاه البكاء:

- أنا آسفه يا محمد والله ماكنش قصدي.. أنا كنت عايزاك تفرح .. بس قولي اعمل إيه عشان تسامحني وانا هعمله؟

محمد وهو يمسح على رأسها:

- بس ياهبله.. أنا ماقدرش ازعل منك.

- بجد يعني مش زعلان مني؟

- ماقدرش ازعل من روجي.

- طب اثبتلي.

وتركت سلمى غرفة محمد وهي ترفرف من فرحتها
أخوها سينام مرتاح البال، لكن ظنها خاب!
ظل محمد يفكر في وضع والده ووالدته، يحاول أن يحل
بينهما، لكنه لا يجد طريقة .. وماذا عن والدة نور أيضاً؟
.. هو لا يحبها، لكنه يتحملها من أجل نور.

نجح محمد في مهمته لكن نور فشلت. دخلت غرفتها
فاقده الأمل في إرضاء أمها بعد أن منحتها الحقيبة التي
اختارها محمد لها كي يلين قلبها ناحيته، لكن حين منحتها
نور إياها ردت ببرود:

- جايلي حته شنطه أعمل بيا إيه؟ وكان باعتها معاكي؟ مكسل يديهاني هو؟ ..
خلياله .

سعيدة هي نور بمحاولات محمد لإرضاء الجميع، لكنها
فاقده الأمل في إرضاء ماجدة. تقف عقبة في حياة نور،
لكن نور تحبها، وتعلم أنها أيضاً تحبها، لكن لا تعلم كيف
تظهر ذلك! .. تعلم أن تلك التصرفات بسبب تجاربها
الفاشلة في الحياة، تخشى عليها أن تقع في حفرة عميقة لا
تخرج منها.. لكنها على كل حال تتمنى أن تتيسر الأمور
حتى ولو قليلاً.

مرت الأيام على نفس الوتيرة يقوم محمد بكل ما في
وسعه لإبعاد جميع العقبات التي تقف في طريق زيجته،

- رينا يستر .. أنا كمان قلقانه!

- بإذن الله خير ماتخافيش .. قومي كمي اللي وراكي وانا هعمل شوية حاجات وهكلمك وانا نازل الشغل.

- تمام اتفقنا.

أغلقا محادثتهما لتجد محمد كتب منشورًا: (تفاعل بما تهوى يكن).

تُعجب نور بشخصية محمد يومًا بعد يوم .. لم يخبرها بحبه صراحة، لكن كل أفعاله تؤكد ذلك .. هي أيضًا قلبها يزداد تعلقًا به بدون سيطرة منها، لأول مرة تشعر أن أمنياتها تتحقق، لم تكن تتمنى وجود رجل في حياتها بقدر رغبتها في أن تكون سعيدة، أن تكون مطمئنة. وهذا ما تشعر به الآن.

أمسك محمد هاتفه راغبًا في الاطمئنان على والده الذي سافر ولم يعد ولم تصل عنه أخبار.

- إيه يا حاج ماوحشناكش ولا إيه؟

صوت والده يبدو عليه المرض:

- وحشتوني.. هو انا ليا غيركوا يا بني! .. أنا راجع بعد بكرة إن شاء الله.. اتكلم مع امك.. شوفها عيزانا نروح للمأذون إمتي.. أنا رتبت الحال هنا وهاجي اقعد مع اعمامك هنا..

بدأ محمد يفهم سبب ضيقته:

- حاضر يا حاج .. تيجي بالسلامه.
خرج محمد من غرفته. وجد والدته وسلمى يعدان
الفتور:

- كويس إنكوا صاحيين .. اقعدوا عايز انكلم معاكو خمس دقائق.
- في إيه يا محمد؟
- بابا جاي بعد بكرة .. و..و..و .. وطلب مني أكلم المأذون عشان هو قرر يعيش ف
البلد.

نظرت والدته له في حسرة، ثم نظرت إلى سلمى،
وجدتها تحبس دموعها، فهما تربيا على الاحترام بين
والديهما، ولم يحدث بينهما مشكلة أمامهما أبداً. كيف
يحدث كل ذلك فجأة؟! لا يوجد بيت بدون خلافاته
ومشاكله، لكن بيتهم كان استثنائياً، كان يسوده الهدوء،
يسوده التفاهم.

ردت والدته في حسم:

- ماتكلمش المأذون يا محمد ... أنا مش عايزه اتطلق .. أنا عايزه اعيش ف حضن
ابوك الحبه اللي فاضلين ف عمرنا ... وعايزه اروح اعيش معاه هناك.
- ماما إتي بتكلمي بجد؟

ترد وهي تبكي وتبتسم في الوقت ذاته:

- آه بتكلم بجد .. اللي أبوكوا عملوا معايا طول حياته يستاهل مني أعيش معاه العمر
كله.



احتضنها محمد وسلمى، وقَبِلَ رأسها لما بثته من فرح داخلهما. ها هي إحدى مشاكله قد حُلَّت بمفردها، حُلَّت بكلمة. يتمنى أن تتحدث زوجته عنه مستقبلاً كما تحدث والدته عن زوجها. الآن يسعى لتكون سيرته طيبة كوالده.

منذ فترة طويلة لم يذهب محمد إلى عمله وهو في تلك السعادة. أخبر نور بما يحمله من جديد وهو في طريقه إلى عمله تنفيذًا لاتفاقهما. شعر لوهلة أن نور سعيدة أكثر منه بكثير، طلب منها أن تأتي هي وماجدة إلى بيتهم يوم الخميس كما اقترحت والدته، وطلب منها أن تخبر خالتها ومريم أيضاً؛ ليزيد التعارف، ولتكون آخر مقابلة قبل سفر والديه واستقرارهما في محافظة أخرى .. وافقت نور من دون تردد، لكنها لا تعلم قرار ماجدة بعد! قبل أن تهم نور بالذهاب إلى جامعتها، فكرت في أن تخبر والدتها باقتراح محمد، فدخلت عليها الغرفة لتجدها تتحدث في هاتفها، لكن بمجرد رؤية ماجدة لنور، تركت هاتفها وارتبكت، وكانت في حالة لأول مرة نور تجدها فيها!

- في إيه يا ماما كتي بتكلمي مين؟

ماجدة حاولت أن تخفي ارتباكها في عصبيتها المعتادة:

- إيه كتي بتكلمي مين دي؟! .. داخله فجأة كده؟! عايزه إيه؟!
- محمد كان كلمني.. قالي إن مامته عزمانا ع الغدا يوم الخميس عشان هتسافر مع عمو
البلد وهيعيشوا هناك.
- آه يا حبيبتي نروح وماله.. يلا عشان ماتأخريش على جامعتك.. وإن شاء الله
نروحلهم يوم الخميس.

تعجبت نور من موافقة أمها دون تردد أو استجوابات!
لكن نور حمدت الله؛ لأنها لم تكن تريد أن تخبرها أن
والدي محمد لن ينفصلا، لعل ذلك يشب في قلبها الغيرة،
على رغم من أنها ستعلم في كل الأحوال.
- طيب تمام يا ماما أنا هنزل بقي عشان ماتأخرش.

لاحظت نور أن مريم تشعر بغربتها منذ خطبتها، تشعر
أن نور تبتعد عنها من حين إلى حين، فقررت أن تعيد
الحال إلى ما كان عليه. أصبحت تعيرها اهتمامًا أكثر،
وكانت مريم سعيدة بذلك .. ولدت مريم لتجد نور أكبر
منها بسنة.. أمهما كانتا تربيان فيهما الأخوة بينهما،
وكانت تزيد مع الوقت. فعلت مایسة المستحيل لتسجل
لمريم في مدرسة نور قبل سنة من ميعاد تسجيلها ليكونا
معًا طيلة دراستهما، وكان ذلك يجعل ماجدة ومایسة
مطمئنتين على بنتيهما. ارتبطتا ببعضهما ارتباطًا وثيقًا



كالتوأم، لا يفارقان بعضهما أبدًا. يشجعان بعضهما للتفوق في الدراسة منذ أيام المدرسة وحتى الجامعة. تفرقتا عند الالتحاق بالجامعة بسبب قرار ماجدة تغيير السكن. حاولت مريم بكل الطرق إقناع مایسة للانتقال إلى سكن قريب من نور، حتى تلتحق معها بنفس الجامعة، ونجحت في ذلك بعد أن أنهت ثلاث سنوات في كلية الآداب بقسم الجغرافيا. كذبت على الجميع حين أعلنت أنها تريد الالتحاق بتلك الكلية لتكون بجانب نور وقتًا أطول، كانت تتمنى أن تدرس في كلية الحقوق. كانت دائمًا تريد أن تبقى مع نور، حتى إذا كان ذلك يعارض طموحاتها.

بعد تغير الأحوال، قررت أن تحقق حلمها، خاصة بعد فشل مريم في نيل إعجاب فارس الأحلام بها وإعجابه بنور. قررت أن تركز في مستقبلها أكثر. أخبرت والدتها أنها تريد أن تتم دراستها في الجامعة، ثم تبحث عن فرصة عمل في الخارج وتساfer مع والدتها لتبدأ حياتها الجديدة. علمتها الحياة مؤخرًا أن مصلحتها يجب أن تكون أولى أولوياتها. لا أحد سيهتم بها سواها.

* جاء يوم الخميس *

بعد أن انتهى الجميع من تناول الغداء الذي أعدته والدة محمد بعناية كي ينال إعجابهم، طلب محمد أن يجلس مع

نور في الشرفه حتى ينتهوا من تناول الشاي الذي أعدته سلمى تعويضاً عن عدم مساعدة والدتها في إعداد الغداء، وجلس البقية يتحدثون عن أحوال البلاد، وبدا والدا محمد وسلمى كعروسين جديدين، تحاول والدته أن تصلح ما أفسده الزمن، تحاول أن تبتث الحب في علاقتها مع زوجها الذي ضحى من أجلها منذ بداية زواجهما حتى الآن، تحاول أن تسعده، فهتمت ماجدة ما أخفته عنها نور بشأنهما، لكنها حاولت أن تبدو طبيعية تتحدث وتضحك وتحاورهم، حتى والدا محمد لاحظا تغيراً في ماجدة. منذ يومين فقط كانت ضد زواج محمد ونور، وكانت تتجنب أسرتهما الصغيرة .

في البلونة:

- إيه رأيك ف بلكونتنا؟
- حلوه يا بختكوا إحنا شقتنا كلها شبايك بس.
- قري على شقتنا بقى.
- آه براحتي على فكره.
- براحتك يا باشا .. ماقولتليش مامتك عجبتنا الشنطه ولآ إيه؟
- آه عجبتنا جدأ وعجبنا ذوقك كمان.
- حاسس كده والله أعلم إنك بتضحكي عليا بس ماشي.



- سيك من الشنطه دلوقتي .. وصلت لإيه مع مامتك وباباك ؟
- ماما قررت إنها تسافر مع بابا البلد .. وإن ده أنسب قرار وأنا وسلمي هنتعد هنا لحد ما نحدد معاد جوازنا. وهنشوف سلمى حابه تعيش فين .. بس هي نفسها تروح تقعد مع بابا وماما .. وبصراحة أنا مبسوط من ناحية فكرة سفر ماما وبابا.
- محمد هو انت ليه مسألتنينش عن بابا قبل كده ؟
- سلمى كانت قالتلي إنه هو ومامتك منفصلين من سنين طويله وإنه سافر بره وانا ماحبتش أضايقك بسؤالي .. قوتل اتتي لما تحبي تحكي لي هتحكيلي .
- يعني بعد ماحكي هتفضل عايز تتجوزني برضو ؟
- إيه الهبل ده ! أنا هتجوزك اتتي مش هتجوزه هو .
- بص يا محمد .. ماما وبابا ماكلنوش متفقين مع بعض خالص .. ماما اتجوزته وهي مش بتحبه .. جدو اللي أجبرها إنها تتجوزه زي أي حد ف الزمن بتاعهم .. كان عمل كده مع خالتو قبل ماما .. ماما حملت قبل خالتو وخلفتني وبعدها على طول خالتو خلقت مريم .. ماما دائماً كانت بتقارن حياتها بحياة خالتو لحد ما كرهت بابا .. وبابا كمان كرهها زياده واتجوز عليها وجدو خلاهم يطلقوا .. هو سافر وبیسأل عني كل سنه مرة وانا فضلت مع ماما وانا قلمت مع عقدها ف الحياه .. كنت بخاف أفضل زي ناس كتير .. بس بقول يمكن هتعلم منهم ..

شعر محمد أنها ستنفجر بكاءً، فحاول أن يمنع ذلك:

- إتني بتحكي ده كله دلوقتي ليه ؟ .. ماتشكريش بالطريقه دي .. صوابك مش زي بعضها .. إتني مش مامتك وأنا مش باباكي .. أمال قرفانا بس بدرس علم نفس وأديكي متشحتفه هو ..



ابتسمت نور ..

كيف يفعل محمد ذلك بقلها ويجعله يهدأ بكلمة؟!

قاطعتهما سلمى:

- جوزين كناريا ياخواتي..

- أهي الرغايه جت.

- على طول بتشكر فيا أودام الناس .. أنا غلطانه إني جايه أونسكوا يعني؟

- جايه تونسينا ولا ترخي علينا؟

- الاتنين بصراحه... هي مريم وطنط ماجوش ليه يانور؟

- مريم قالتلي إنها رايحه مشوار مع كريمه بنت عمها وخالتو عندها شغل النهارده.

- يا خساره.. كان نفسي أشوف مريم.. بقالي كثير ماقعدتش معاها ... المهم ماما

بتقولكوا تعالوا اقعدوا معانا شويه عشان مامت نور عايزه تروح وماما مسكت فيها

تفضلوا شويه.

- طب يلاً نقوم عشان امي هتبوظ الدنيا .. ده لو ماكانتش بوظتها يعني.

- طيب عشان مش هعرف اتكلم معاكي أودامهم .. أول ماتروحي افتحي الفيس

عشان عايز أبعثلك حاجات آخذ رأيك فيها.

- حاجات إيه ها؟

- بس يا حشريه اتتي.

- طب بس ماتخاقوش.. يلاً نطلعهم بدل مايرمونا من هنا.

لم تعتد نور على أن تتحقق أمنياتهما، حتى إن كانت سهلة.
دائمًا هناك عقبة. مؤمنة بأن ماجدة ستظل هي العقبة في

طريق زواجها، سواء كان بمحمد أم بغيره.. زُرعت
عُقدة بداخلها تجاه جنس الرجال، لكنها لم ترها عُقدة أبدًا،
وهذا ما يجعل الأمر يزداد سوءًا.

وصلت نور مع والدتها إلى منزلهما. كانت تخشى من أن
تتفجر العاصفة عقب وصولهما، فهي لم تعتد على الهدوء
الذي تحلت به ماجدة تلك الأيام.
نفذت نور ما طلبه منها محمد.

- أدبني فتحت.. ها احكي لي.. كنت عايز تقولي إيه؟

- أنا جايلي شغل ف اسكندريه أحسن من الشغل اللي أنا فيه بكتير.

- وبعدين؟

- مش عارف أعمل إيه! ... إحنا لسه بدري على معاد فرحنا ولازم أبقى موجود
هنا عشان الشقه والتجهيزات وبابا وماما هيسافروا الأسبوع الجاي ومش
هينفع اسيب سلمى وانا مستني الفرصة دي من زمان.

- سيديا على ربنا وصلي استخاره وكده كده شغلك هنا مش وحش.

- حسن اللي كان جايلي الشغل ف الصيدلية اللي هنا والصيدلية شغلها قليل..
أنا بحس إني ماستحقش المرتب ومش حاسس إني بتطور.. حاسس إني واقف
مكاني.

- طب ليه ما فكرتش تدور على شغل أحسن هنا.

- حسن شغلني معاه بطلوع الروح.. صاحب الصيدليه ماكانش موافق ودورت
قبلها كتير وماكنتش بلاقي.



- طیب صلی استخاره واستنی لما نشوف الدنیا هتمشی ازای..
- تمام ... یلاً قومی زاکری شوپه ونامی وانا شوپه وهنام.
- ماشی ... سلام.
- سلام.



الفصل الخامس
(دائماً هناك أولويات)

سمعت صوت خطواته بالخارج، لكنها تخشى أن تقف فيصيبها الدوار وتقع أرضاً. وصل حتى باب الغرفة وهو يناديها وهي لا تجيب. يطرق الباب استئذاناً للدخول وهي ما زالت صامتة. فتح باب الغرفة وأضاء النور، فوجدها مستلقية على السرير، وجهها يغطيه احمرار بسبب ارتفاع حرارتها، فاقترب منها ليجدها تنظر له ثم تغمض عينيها لا تنطق بكلمة ولا تتحرك. صعد لأستاذ إبراهيم، الموظف المسئول عنهم في رحلتهم، أخبره بمرضها، فنزلت زوجته مع سالم لتكون جوارها، فهي طبيبة وستفهم حالتها. دخلت شقتهم فوجدت الوسادة والغطاء على الأريكة في الصلاة، وغالباً فهمت أن سالم لا ينام بغرفتها .

بدأت تستوعب ما يدور حولها، وجدتها جالسة على كرسي بجانب سريرها:

- صباح الخير.

سعلت أكثر من مرة قبل أن تجيبها.

- صباح النور.

- كل ده نوم .. حمد الله على سلامتك.

- الله يسلمك .. هو سالم مارجعش؟

- لا.. رجع وراح شغله من بدري.

ثم أردفت:

- على فكره ده يبجك أوي.

لم تفهم ما تقوله، فابتسمت لها حتى لا تثير الشك.

- كان يفضل سهران جنبك طول الليل ومش بينام وماينزلش شغله غير لما يظمن إني معاكي وكان خايف وملهوف عليكي جدًا.

لولا وجع جسدها الذي سيطر عليها، لقفزت من على فراشها فرحًا.

- المهم شدي حيلك يلا عشان خلاص المؤتمر فاضل عليه أيام.. أنا هطلع انا أحضر الغدا ومجرتلك كام حاجه كده وسيبتهم ف التلاجه عشان ترتاحي شويه كيان.

- تعبتني نفسك ليه؟

- لا ماتقوليش كده.. مافيش تعب ولا حاجه.. إحنا جيران برضو وف غربه .. أنا هستأذن بقي ولو احتاجتي أي حاجه أنا موجوده.

- ربنا يخليكي متشكره جدًا.

- يلاً مع السلامه.

- سلام.

ماهذا الألم كله؟! لم تكن حمى، كانت غيبوبة، تشعر
بصداع في رأسها أغلب الوقت، تريد أن تعرف أين كان
تلك الأيام ولماذا عاد؟!!

رأته يدخل البرج الذي يقيما فيه، فارتسمت ابتسامه على وجهها.

- سلام عليكم .. حمد لله على سلامتكم.
- الله يسلمك.
- بقيتي أحسن؟
- آه الحمد لله أحسن بكثير.
- إتي إيه اللي تبك كده؟
- كنت عايزه أفهمك إيه اللي حصل وانت مادتيش فرصه فكنت بستناك كل يوم ف البلكونه عشان أبقي صاحيه لما تيجي وافهمك.. بس الظاهر ماتحملتش الجوى.

يبدو أن كلماتها أشعرته بالخجل من نفسه!

- أنا آسف بجد.
- حصل خير .. أنا بس كنت عايزه أفهمك .. أنا كلمتها عشان أعرفها إنك بتتعب عشانها وعشان تبقوا سوا ماكانش قصدي بيتي في مشكله بينكوا وقولتها إني زميلتك ف الشغل.
- لما كلمتها ماقلتيلش كده .. قالتلي إنك قولتها إني بجبك وجينا هنا عشان نتجوز فأنا ماتحملتش الكلام.
- والله أنا ماقولتش كده.
- أنا عارف.



- عارف منين؟
- سميره فرحها النهارده.
- الدموع ملأت عينيه، لكنه كرجل شرقي صعيدي لن
يسمح لها بأن تنهمر.. عادات عقيمة!
- عملت كل الفيلم ده عشان تتجوزه وضميرها مرتاح.. كانت بتتلكك يعني.
- مش عارفه أقولك ايه!
- ماتقوليش حاجه.. كل اللي ربنا عايزه بيقتي خير لينا .. المهم أنا آسف تاني على
عصيتي معاك.. أنا بس كنت مصدوم ومش فاهم إيه اللي بيحصل!
- ولا ييمك أنا مقدره ده.
- يمكن ربنا خلاكي عملي كده عشان أعرف حقيقتها.
- ربنا هيكرمك وهي عوضك إن شاء الله.
- يا رب.
- ثم تنهد وكررها ثانية.
- عرفتي حاجه عن المؤتمر بتاعك؟
- المفروض أروح بكرا بدري عشان أسجل اسمي تاني.. هتأكد يعني مش أكثر
وفي شوية ورق كده هخلصهم ويس.
- على خير إن شاء الله .. يلاً ادخلي ارتاحي شويه عشان تعرفي تخلصي
الحاجات دي بكرا.
- ماشي .. تصبح على خير.

- واتي من أهل الخير.

تركته ذلك اليوم وهو يبدو متماسكًا، لكنها متاكدة أن بداخله براكين ستثور فجأة دون مقدمات، لا تجيد التصرف في المواقف تلك، لكنها تشعر به جيدًا، فالقصة نفسها تتكرر أمامها. على كل حال، احترامها له يزداد يومًا بعد يوم.. أنهيت تجهيزاتها للمؤتمر، وبدأت تتمرن على كلمتها التي ستلقيها في ذلك اليوم، وكان يساعدها فيها، وقد نالت أبحاثها إعجابه، وحاول أن يقنعها أنها ستعجب الجميع في المؤتمر، لكن التوتر مازال يسيطر عليها...

لم تأتها الراحة طوال الليل، تسير هنا وهناك، تتخيل شكلها في المؤتمر، تعلم أنه لم ينم مثلها، لكنه حاول أن يتظاهر بالنوم، وحاولت ان تبدو مقتنعة بأنه نائم ليأتي يوم المؤتمر.

في الصباح بدأت تستعد وتهدأ قليلاً، فدائمًا توترها هذا يعيدها لنقطة الصفر، لكنها لن تسمح له هذه المرة. فربما تكون الأخيرة.

قرر أنه سيحضر معها بعد موافقة مديره في العمل. بالنسبة لها كانت سعيدة لذلك، لا تعلم السبب! لكن يكفي أنه يحاول مساندتها.

ارتدت فستاناً رسمياً بعض الشيء، رغم أنها لا تفضل الرسميات مطلقاً، وارتدي هو بذلة قد اشتراها خصيصاً لذلك اليوم:

- يا سمحه هتأخري يلاً.

جاء صوتها من داخل الغرفة ردًا عليه:

- خلاص أهو خلصت وخارجه.

خرجت من الغرفة، وجدت شكله أنيقاً. لأول مرة تراه هكذا. دائماً يرتدي ثياباً تريحه في العمل، وهو أيضاً، ملامحه بدت راضية عن مظهرها، رغم أنها لم تضع أي نوع من مستحضرات التجميل على وجهها، وأن فستانها لم يكن ملفتاً. قاطعت كلماته نظراتهما التي استمرت لثوانٍ:

- إيه الجمال ده!

ابتسمت في خجل، وشكرته على مجاملته، ووجدته يمد يده ليمسك بيدها، انتفضت لما فعله! فمذ زواجهما لأول مرة يقتربان لهذه الدرجة..

في المؤتمر:

دخلا المؤتمر بعد محاولاته في تهدئتها، يفشل مرة وينجح مرة.

استقبلهما مؤسسو المؤتمر، ووجدت مديرتها موجوداً، ورحب بها وشجعتها كلماته كثيراً، وطلب من سالم أن يجلس معه على نفس الطاولة حتى تنتهي من دورها في المؤتمر، ولم يعترض سالم، بل بالعكس. جلست معهم في بداية المؤتمر لتسمع كلمات زملائها وزميلاتها، وتتوتر أكثر، فالكثير منهم أبحاثهم وأداؤهم أكثر من رائع.

وفجأة سمعت اسمها يُنادى .. جاء دورها. تماسكت لنتهض؛ لتجده يمسك بيدها، فيجدها ترتجف، قرَّب فمه من أذنها لتسمعه يقول:
-ماخافيش هتبقى أحسن واحدة ربنا معاكي.

أخذت نفساً عميقاً وصعدت على المسرح..
وقفت أمام المنصة، واقتربت من الميكروفون وبدأت...

تقترب الاختبارات، وتنهمك نور ومريم وسلمى في أدائها، تحاول مريم أن تنعزل عن الجميع تلك الفترة، عليها تنفيذ ما عاهدت نفسها عليه، عليها تعويض نفسها عن تلك الخيبة التي حطمت أول أحلامها. دائماً تعاتب نفسها: أكانت محقة حين بدت غير مهتمة بحب محمد

لنور، أم كان عليها توبيخ نور لما أخفته عنها عن إعجابها بمحمد؟! تعيش مريم بدعاء والدتها، دائماً تدفعها للخير، تتمنى لها حياة أفضل ...

- قررت هتعمل إيه ف موضوع السفر والشغل؟
- مش عارف يا حسن!.. بس الفرصه دي ماتعوضش .. بس ماعنديش حل غير إني أفضل هنا .. لو انا ماروحتش روح انت الفرصه كويسه جداً.
- يا بني روح خساره.
- بفكر اتكلم مع صاحب الصيدليه هنا وادخل معاه شريك.
- بجد؟... طب كويس.
- ربنا يسهل إن شاء الله.
- رن هاتفه، وجاءه خبر لم يكن في الحسبان!.... أخبرته نور أنها تريد مقابلته حالاً بالقرب من عمله، ولكن صوتها يشير إلى مشكلة أكبر.. أكبر من كل ما مر عليه!
- أنا آسفه يا محمد إني خليتك تسبب الشغل فجأه.
- إيه اللي حصل؟
- مش عارفه هو عرف ازاى.. والله أنا ماقولتش لحد!
- إهدي عشان أفهم .. هو مين وعرف إيه؟!!
- بابا..

وقعت الكلمة على محمد كبيت هُدم دون سابق إنذار ...
مات كل من سكنه وعمر الخراب مكانه!

- ماله؟!

تستيقظ نور من نومها على صوت طرق الباب، تشعر أن أصابع الطارق تدق على رأسها لا على الباب، يؤلمها رأسها لسهرها الزائد الفترة الأخيرة، تتمنى أن توقعه أمها وتفتح الباب، فربما حين تقف طرقات الباب تقف دقائق رأسها أيضاً، لكن دون جدوى.

هبت نور لتتولى ذلك الأمر.. من منا لا يحب المفاجآت؟! من يقول إنه لا يحبها كاذب! هو يحبها، لكن نصيبه كان في مفاجآت مناقضة لأحلامه ورغباته، لذلك نفر منها، لكنه إذا أتته واحدة مرضية له، سيعلن عن حبه لها، وسيتمنى أن يصبح كل يوم على مثلها. والعكس كذلك. هناك هائمون بالمفاجآت، ومع أول صدمة يتجنبون ما يفتقد ترتيبهم! ترى كيف سيكون حظها اليوم؟!

فتحت نور الباب لكن :

ما زال الطارق مجهولاً بعد ... حاولت نور عصر مخها لتتذكر أين رأت تلك الملامح؟!... نعم .. رأتها في صور

تحتفظ بها أمها تزيها إياها من حين لآخر حتى لا تنسى ذلك الوجه.

- بابا ..

- ممكن أدخل؟

- اتفضل.

كانت أصعب كلمة تنطقها نور .. لم ترد ذلك، لكنها لن تمنع والدها من الدخول.

- آمال ماجده فين؟

- مش عارفه أنا لسه صاحيه مالمقتهاش.

- كبرتي يا نور.

تضحك نور بداخلها .. أتى والدي اليوم ليلاحظ أنني كبرت عن المرة الأخيرة التي لم أتذكرها أبداً!.. لم تجد رداً مناسباً لتلك الكلمة ففضلت الصمت.

- مبروك..

- على إيه؟

- على الخطوبه .. كنت أتمنى أبقي موجود.. بس ماظنش إنك تتمني إني أبقي

موجود.

كيف علم بخطبتها؟! لا توجد صلة بينها وبينه منذ سنوات! حاولت بشتى الطرق أن تخفي ذلك عن أشخاص تبعد عنهم بأمطار وهو الذي عاش في قارة أخرى يصله الخبر بتلك السرعة؟!..

- الله يبارك ف حضرتك .. بس حضرتك عرفت منين؟!
- فاعل خير زي مايقولوا ... ماكتيش ايزاني أعرف كان؟!
- لأ طبعا ازاى؟
- بقيتي ف سنة كام؟
- هه .. علمت بأمر خطبتي ولا تعلم بأي سنة أكون؟! كيف منحوك لقب أب؟! أنت لا تمت للأباء بصلة.
- رابعه .. رابعه آداب علم نفس.
- طب كويس .. أنا قاعد ف مصر أسبوعين وهرجع تاني عشان وفاء والأولاد لوحدهم.
- أولاد؟!!
- رحمه خمس سنين ورامز عشره .. إخوانك.
- آه .. ربنا يباركلكوا فيهم.
- يارب .. المهم أنا الفترة اللي أنا قاعد فيها هنا عايز اتعرف على خطيبك.
- آه طبعا إن شاء الله.
- طيب هستأذن انا دلوقتي.

- نورت..

أمسكت نور بهاتفها لتخبر أمها عن تلك الواقعة.

- ماما إتي فين؟

- أنا سافرت طنطا الصبح يا نور عشان أعمل تحاليل وأشعه هناك وهاجي كان يومين.

- فجأة كده؟!!

- معلش يا نور مارضيتش أصحكي عشان عارفه إنك سهرانه بتزكري .. في حاجه؟

- لأ مافيش.. خدي بالك من نفسك.

- حاضر واتي كان ..سلام.

- سلام.

لم تتوقع نور ردة فعل أمها حين تعلم بخبر عودة أبيها، فقررت أن تنتظر حتى تعود، لكنها لا تستطيع أن تتحمل ذلك بمفردها .. ما الذي عليها فعله؟! محمد ..

- ماعرفتش أعمل إيه كلمتك على طول .. أنا خايفه أوي يا محمد.

- ماتخافيش.. بس حاولي تعدي مع خالتك ومريم لحد مامامتك ما ترجع.

- ليه يعني؟!!

- إسمعي الكلام لحد مانفهم هو عايز إيه..

- حاضر.
- هخلص شغلي واكلمك وماتشغليش بالك بجاهه غير الدراسة لحد ما الامتحانات تخلص.
- ماشي أنا هروح على مريم على طول وبعدين هاخذها معايا أجيब هدم ليا وهتعد معايم.
- طب تعالي هوصلك أنا على البيت عندك وهستناكي تحت.. حضري حاجتك وبعدين أوصلك عند مريم.

روت نور كل ما حدث لمريم فور وصولها .. تعجبت نور من تقبل مريم للموقف! لم تنصدم كما انصدمت هي؛ مما جعلها تشعر أن مريم شامته فيها أو غير متفهمة لما يحمله قلبها! بدأت تقلق من فكرة الزواج. هناك حكمة من كل تلك العواقب التي سدت طريقها ..

ساعدتا بعضهما حتى تنهي كل منهما دراستها، ربما يخف توترهما أيام الامتحانات .. كانت سلمى متفوقة عن نور، وكانت نور تستعين بها كثيرًا وكذلك مريم ... تحاول سلمى أن تتوطد صلتها بنور وتتمكن من إقناعها بأن تحدد ميعادًا مع والدها قبل عودته إلى بلده الثانية



ليتعرف على محمد وكان محمد قد طلب منها ذلك. وافقت نور بعد إلحاح شديد من الجميع، حتى من والدتها التي لا تنطق اسم والدها إلا ويليه كلمة (بكرهه). عندما عادت وعلمت بما حدث طلبت من نور أن تقبل طلب والدها.. هو في كل الأحوال أيام وسيغادر.

محمد كان أكثرهم إلحاحًا، كانت بداخله رغبة ليتعرف على من جعل بداخل نور ذلك الألم، يحاول أن يتجنب أن يشبهه حتى ولو قليلاً لذلك أراد معرفته عن قرب.. وحدث ذلك فعلاً..

حدد موعدًا للقائهما، وحضر محمد في الموعد:

-إزيك يا محمد؟

- الحمد لله بخير يا عمي.. نورت مصر.

- مصر دايماً منوره..

- أمال سبتها ليه؟

- عشان لو فضلت فيها هجرح ناس كثير بحبهم.

- ولما تمشي هتجرحمم برضو.

- بيتيألك .. أنا جريت الاتنين.. المهم سيبك مني أنا دلوقتي .. أنا عايز أسألك سؤال

واحد بس..

- إفضل.

- إنت بتحب نور بجد؟

- لو ما كنتش بجيها بجد ماكانش زماني قاعد مع حضرتك دلوقتي ... أوعدك إني هحطها ف عيني.

- ربنا يهنيكوا ببعض ... أتمنى ماتعملوش زي الخطوبة وتعزومني على الفرح.

- طبعاً حضرتك هتبتى موجود.. أمال انا هحط إيدي ف إيد مين ف كتب الكتاب؟

- ردودك مترتبه يا محمد.

- مش فاهم.. دي حاجه حلوه ولآ حاجه وحشه؟

ابنسم والد نور وغير اتجاه الحديث:

- اتشرفت بمعرفتك يا محمد.

- وانا كمان.. بس ممكن قبل ما امشي أسأل حضرتك سؤال؟

- أسأل..

- هو حضرتك عرفت مينين موضوع الخطوبه؟

- حد كان عايز يبوظ الجوازه.. وانا كنت جاي أبوظها الحقيقه.. بس لما شوفتك

عرفت إنك هتعمل لنور اللي أنا ماعرفتش أعملهولها وأنا ماكرهش نور.. بس هي

الظروف جت كده ونفسي تبتى مبسوطه..

رغم رفض محمد لكلمة ظروف تلك، إلا أنه حاول أن

يوقف الحديث عند تلك النقطة، فربما تطويله يعيد تفكير

والد نور إلى ما جاء إليه في الأساس.

- نورت يا محمد..

- متشكر بعد إذن حضرتك.



- مع السلامه .
- على الفور، أخبر محمد نور بكل ما دار في تلك المقابلة، وطلب منها أن يتقابلا ليحكي لها التفاصيل وأنه عليهما استغلال يوم إجازته، واقترحت نور أن يلتقيا في كافيتريا بجوار النيل:
- سرحان ف إيه؟
- ف كلام باباكي.
- إشمعنا؟
- مش عارف.. حسيت في كلامه بغموض غريب كده وماكنتش فاهمه بصراحه.. بس اطمنت من ناحيته وماظنش إنه هيقف ضد جوازنا.
- أنا بس هموت واعرف مين اللي قاله على الخطوبه!
- سألته وماقليش إجابته مفيده.. بس قالي إنه حد عايز يبوظ الجوازه!
- يعني هيكون مين اللي مش عايزنا نتجوز؟!
- لا.. هما كبير الحقيقه.
- ضحكت نور لإجابته السريعه: بص.. أنا ف الأول كنت فاكزه إن مريم هي اللي قالتله لاني لما حكيتها ماستغربتش وقالت إن الموضوع عادي..
- أكيد هنعرف وكل حاجه هتيجي ف وقتها.
- بابا وماما هيسافروا اليومين دول خلاص.. وبفكر ارواح معاهم أوصلهم واسلم على قرايبنا هناك عشان أبقي متطمئن عليهم.

- إيه ده! أنا وسلمى امتحاناتنا هتبدأ يوم الحد ومريم بدأت إمبراح خلاص .
- مانا كمت شايلى هم الموضوع ده لاني عارف إن سلمى هتمل وهي لوحدها.
- ماتخافش.. أنا أول ما أصحى كل يوم هروح أفعد معاها أو هي تجيلي ونزاكر سوا.
- ياريت يا نور .. لو ماما وبابا هيستقروا هناك إعملي حسابك إننا هنتجوز بعد النتيجة.
- نور.. إحنا كل ما بنتأخر بتطلعنا مشكله جديده ومالوش لازمه التأخير.
- طب والشقه؟ هنعمل فيا إيه؟
- هنعيش ف البيت عندنا ونبقى قريين من مامتك ومن شغلي.
- وسلمى؟
- لما اتكلمت معاها ف الموضوع ده اقترحت إنها تسافر مع بابا وماما وتيجي كل فتره تقعد معنا وترجع تاني.
- سلمى طيبه أوي يا محمد يا بختك بيها.
- يا بختي بيكوا..

(الحب في المقام الأول أفعال، لكن ذلك لا يمنع أهمية الكلام وما يحدثه من تغيير، فربما كلمة واحدة تقلب كيانك كله.. كلمة (أحبك) التي لم يفهم معناها الباطني

بعد.. عرفنا معناها الحرفي واعتدنا عليها، لكن لا أظن أن هذا فقط هو مغزاها. تمكنت من بناء علاقات قوية، علاقات مؤبدة، لكنها تبقى كلمة اعتيادية، هناك الأقوى منها).

استعد الجميع لأداء مهامه..
محمد سافر مع والديه بعد معاناة لإقناع مديره لمنحه إجازة، لكنه وافق في النهاية.

أوفت نور بوعدھا، وظلت بجوار سلمى حتى لا تشعر بالوحدة.

مريم عليها أن تفوز بالتحدي.
ماجدة ومايسة، تتسع بينهما المسافات مع الأيام، والغريب أنهما مؤيدتان ولم يظهر أي توضيح لذلك!
نور لديها مهمة إضافية، عليها أن تقنع والدتها بتعجيل موعد زواجها ...

لأول مرة تقف الحياة بصف نور، ماجدة توافق بسهولة، لكن كعادتها دائماً، لديها شروط، هذا مقابل ذلك. هكذا هي الحياة. شرط ماجدة الوحيد أن تنجح نور بتقدير ثم تفعل ما تشاء، لم يكن الشرط صعباً بالنسبة لنور، لكنه لم يكن هيئاً، فالاختبارات قد بدأت منذ أيام، وهي لم تكن

مطمئنة تجاه أدائها فيها. وليكن ... ما زالت هناك فرصة .. ما زالت هناك مواد لم تختبر فيها بعد..

أقام محمد بعض التعديلات في الشقة؛ أملاً في أن يكون كل شيء جاهزاً بعد انتهاء الاختبارات، وتعاونه سلمى على ذلك، رغم انشغالها بدراستها .. طلب محمد من والد نور أن يمد إجازته في مصر حتى يتم زواجهما ووافق، واقترح عليهما المساعدة، لكن محمد أخبره أن وجوده يكفي.

تنتهي الاختبارات وقد انتهى محمد من مهام الشقة، وظهرت الشهادات، وكان الجميع منتظراً لذلك اليوم، وانفقت نور وسلمى على الذهاب لمريم بعد أن أخبرتهما عن أنباء ظهور الشهادات على الموقع الخاص بالجامعة:

- أيوه يا محمد..
- ها طمئني يا سلمى .. عملتوا إيه؟
- أنا نجحت الحمد لله.
- طب مالك متضايقه ليه كده؟
- خد نور معاك:
- إزيك يا محمد؟
- إيه يا نور ... إتي بتعيطي؟
- آه .. أنا شايله مادتين يا محمد..

- هو مش انا واتي واحد؟ وبعدين المهم نبقي سوا.
- إوعدي يا محمد إنا مش هنفضل ف الشقه دي على طول.. وإنك هتجيلي شقه تبقي بتاعتنا إحنا.
- أوعدك.

ليصلا إلى مطعم مشهور.. تحب نور تصميمه وخدمته جداً... فرحت حين رأيت نفسها أمامه، وظننت أن تلك هي المفاجأة لتدخل وتجد مفاجأة أكبر! الجميع هنا: خالتها، ومريم، وماجدة قد وصلت قبلهما، وسلمى، وحسن صديق محمد المقرب، يجلس مع والدها.. علمت أن ذلك الاحتفال فكرة والدها بالتخطيط مع محمد، أرادا أن يحتفل الجميع بنجاح الفتيات، وأيضاً للاحتفال بعيد ميلاد نور الذي بقي عليه يومان.. لكن أين مفاجأة محمد إذن؟

- مبروك وكل سنه واتي معايا.
- آه قول كده بقي.. إنك ضربت عصفورين بجحر واحد.. ياترى بقي جيبت هديتين ولأ هديه واحده برضو؟
- ماديه حقيره... هديه واحده بصراحه.
- شوفت أنا عندي حق ازاي!
- طب اعرفي هي إيه الأول.
- ههههههه أنا بهزر.. كفايه إنك فكرت فيا.

وقف محمد وأمسك بهدية صغيرة مغلفة بشكل ملفت..

- بصوا يا جماعة.. أنا ماليش ف الرسميات.. فأنا هخلي نور تتولى الموقف.

لم تفهم نور كلماته، فوقفت بجانبه، وفتحت الهدية لتجدها
(دعوة فرح محمد ونور).

في باخرة، ظلت نور تُخبر محمد أنها تتمنى أن تقضي يوماً معه فيها، كادت تحتضنه من فرحتها، لكنها تمكنت من السيطرة على ذلك.. بارك لهما الجميع، حتى مريم، كانت سعيدة بذلك القرار.. ظنت أن هذا يجعلها توقف تفكيرها في محمد أكثر.

رغم فرحة نور بكل ذلك، إلا أنها شعرت أن محمد باله مشغول بشيء ما!

- في إيه يا محمد؟

- في حاجه غريبه!

- حاجه غريبه ازاي؟!

- بصي حسن وباباكي.. مندججين مع بعض ازاي!

- طب فين المشكله؟

- ماظنش إن دي أول مره يتقابلوا فيها.

- قصدك إيه؟!

- أنا نفسي مش فاهم.. هفهم واقولك.

انتهى الجميع من تجهيزات حفل الزفاف. كان الحفل بسيطاً كما طلبت نور، لم تفضل الضجيج طوال حياتها، وأرادت أن يوماً كهذا يجب أن يكون هادئاً.. رغم بساطة فستانها الأبيض، إلا أنه لفت نظر الجميع، خاصة محمد. بعد عقد القران والمباركات والدعوات، غادر والد نور إلى حيث أتى. كانت والدتها تسلم عليه بحفاوة. وهذا ما جعلها تشك في أمرها! معقول هذا؟! أمي أخبرته بأمر خطبتي .. لكن لماذا؟! كان يمكنها أن تنهي الزواج قبل أن يبدأ بكلمة منها! لا يهم.. الآن زوجي أصبح هو عائلتي الجديدة، على كل حال بعد دقائق سأكون في بيتي .. بيتنا.

سافرت سلمى مع والديها كما اتفقا من قبل.. كانت راضية تجاه تلك الفكرة، وتشعر أن ذلك سيكون أحد الأسباب التي تجعل أباها سعيداً.. تحاول إسعاده بكل السبل.



الفصل السادس
(ربما كان علينا الرحيل، لكننا لم نستمر عبثاً)

وقفت أمام المنصة، واقتربت من الميكروفون وبدأت:

- أنا سميحة سيد من مصر.. وجايه هنا يمثل شركتي (شركة الحرية) والحقيقه الشركه دي ليها فضل كبير جدًا عليا ماقدرش أنساه ولولا تشجيع مديري وزميلي ماكتش هبتي موجوده هنا النهارده ..أغلب اللي اتكلموا قبلي اتناقشوا عن الأسره.. بس بمنظور مختلف شويه عن منظوري .. تقريبًا أنا هتكلم في اتجاه ثاني خالص .. هما اتكلموا عن العلاقات الناجمه والأسر المتاسكه وما شابه .. بس أنا هتكلم عن التفكك الأسري.

حاولت ألا تلتقي عينيها بعين أحد في القاعة حتى لا تتوتر أكثر، لكن بعد كلمتها الأخيرة، ألقيت نظرة، فوجدت الوجوه كلها عابسة عدا سالم .. لم تياس وأكملت:

- عندنا في أغلب الدول العربيه ماينتمش غير بتأهيل الأفراد علميًا وبنسى لإننا المفروض نأهلهم إنسائيًا عشان يقدرنا يحصلوا المواد العلمية اللي بنحتاجها ف سوق العمل .. العلاقه الرسميه المشروعه الوحيده ف حياتنا تقريبًا هي الزواج.. معظم حالات الجواز في الدول العربيه بتبقى في سن صغير لأكثر من سبب.. سواء كانت البيئه أو الثقافه أو الجهل وأسباب ثاني كثير .. وبرزو في حالات بتتجوز في السن المناسب بين ٢١ ل ٣٠ باعتبار إن ده سن النضج والمشاركه ف سوق العمل أو المجتمع كمجمل من وجهه نظري على الأقل .. وفي اللي بيتجوز بعد كده.. بس بيبقى الموضوع أصعب لإن في السن ده بيكون العقل كبر زياده.. وبالتالي الأطراف مش بتقبل بتنازلات كثير... أنا هتكلم عن طرف واحد في العلاقه دي وهو البنت.. لإنها مش دايماً بتبقى مخيره .. للأسف مجتمعا الشرقي مع الوقت بيضعف البنت مش يقويها رغم إنها بقت ليها

دور فعال جداً.. لكن ما زال المجتمع هو المسيطر.. وفي حاجات كثير مجتمعا يمنع البنت إنها تعملها غير بعد الجواز زي السفر مثلاً.. لكن في الجمل الطرفين الإيتين أهم من بعض في استمرار الزواج ده أو دماره.. سنة ١٩٩٠ وصلت نسبة الطلاق لـ ٤٠% يعني قربنا للنص، ومن ١٩٩٠ لـ ١٩٩٢ الطلاق وصل لـ ٦٠ ألف و ٥٠٠ حاله ده بالنسبة لمصر.. ويمكن نقول إن النسبة دي بسبب الحالة الاقتصادية.

بس السعودية حالتها الاقتصادية جيدة.. ورغم كده بتوصل لـ ٨ حالات في الساعه ودي نسبة مش هينه أبداً..

كثير حاولوا يشوفوا سبب عام للطلاق.. بس مافيش إحصائيه سليه لسبب معين .. يعني وارد جداً إن كل حالة انفصال تكون مختلفه تماماً عن الباقي.

طيب والدول الأوروبية؟ في أكثر من دوله أوروبية مثقفه بشكل كبير وعندهم وعي كافي.. ومع ذلك في دول بتزيد فيها نسبة الطلاق يوم بعد يوم .. أعلى ١٠ دول عالمياً كترتيب تنازلي :

بلجيكا هي الأعلى عالمياً، والبرتغال بعد ما شرعت الكنيسه الكاثوليكيه الطلاق، المجر، التشيك، إسبانيا، لوكسمبورغ، إستونيا، كوبا، فرنسا، الولايات المتحدة الأمريكية وتقريباً وصلت لـ ٥٣%

وطبعاً كل دول ليها شروطها وقوانينها .. بس الفرق إن الدول الأوروبية بعد الانفصال غالباً بيسود بين الطرفين علاقة احترام متبادله ولو في أطفال تقريباً ما بيتأثروش بشكل كبير زي عندنا.

الغرض من بحثي إني أوضح إن الزواج بقى مجرد مشروع ومش مضمون كان.. ممكن يستمر شهر، سنه، عشره، خمسين.. بس مش كل العلاقات بتفضل آدمية للأسف

.. مش هنختلف إن في علاقات فعلاً ماينفعش تكمل بسبب اختلاف الشخصيات وأنا مش جايه عشان أقول للناس ماتتجوزوش أو ماتلقوش .. أنا جايه أوضح إننا مفتقدين فكرة التعامل مع الناس والمثال على ده إن الطلاق موجود عالمياً.. بس بره هما بيتعلموا ازاي يتعاملوا ف حياتهم.. لكن ف دولنا العرييه نادر لما بنلاقي حاجه زي دي..

من وجهة نظري إننا كلنا لازم نساهم ف توعية الناس بفكرة العلاقات كمجمل.. لازم نوعي الناس ازاي يتعاملوا مع بعض بطريقه تليق بينا كبشر.. يعرفوا إمتي بيدأوا العلاقة وإمتي تنتهي وليه .. مدارسنا بتهم بالماده العلميه ومش بتهم بالإنسانيات اللي من غيرها مش هنعرف نحصل الماده العلميه دي .. محتاجين نثقف القرى .. القرى اللي عايشين بين الزرع وبس.. تعمير الأرض مش إنتاج كائنات وبس لا .. كل واحد ليه دور ف تعمير الأرض.. سواء ف بلده أو مجتمعه أو أسرته أو شغله.. وبالذات الأسرة لإن الأسره مش أم وأب بس لا بالعكس كل فرد ف الأسره ليه دور قوي.. إحنا بنعمر الأرض بكل حاجه بنعملها مش لازم بالتكاثر وإنتاج كائنات بس.. لازم نعمل حساب كل خطوه بنعملها.

بما إننا ف الأول وف الآخر بنتكلم عن نفس الموضوع وهو العلاقات.. سواء كانت ف الأسره أو عامه.. فأنا بطالب إن يبقى في برامج توعيه بشكل دوري ف كل الدول العرييه.. يكون بيقدما متخصصين في مجال علم النفس خاصه ونبداً نفهم كل واحد دوره ويعرفوا إزاي العلاقة تكمل وإمتي تنتهي وازاي نتعامل بعد ما تنتهي. ف الآخر.. أتمنى إن الخلافات ف حياتنا كلها تقل وإن يبقى في أسر تربي جيل ناجح فعلاً.. جيل متزن مش مشتت بسبب الخلافات والمشاكل.



وأكيد مش بإيدنا نتحكم ف نسبة الطلاق باعتبار إني حطيته كمثل لإينها مالهاش سبب رئيسي.. لكن تقدر نتحكم في عواقبه من خلال البرامج دي برضو خصوصًا إن في أطفال أهلها ما عندهمش القدره على توعيتهم كفايه.. فالأفضل إنهم يتواجدوا ف أماكن متفهمهم ومش محسسام إنهم فيهم حاجه ناقصه عننا وهما دول اللي هيكملوا بعدينا.. فاحنا محتاجين نأهلهم إنهم يعيشوا صح.
أنا كده قولت رأيي باختصار شديد وأتمنى أكون وصلت رسالتي.

بمجرد انتهائها وجدته يقف وهو مبتسم، وبدأ في التصفيق بحماس، ليقف الجميع ويؤيده، كادت تبكي من فرحتها. لكنها تماسكت حتى نزلت من المسرح واتجهت لطاولة سالم ومديرها بعد أن انتهى الجميع من تحيتها. صافحت مديرها وبدأ في شكرها.

- هايلاه يا سميحه مع إني معترض على كام تقطه كده.. بس شغلك باين جدًا ف اللي قولتیه.. وأكيد مش هتقفي عند النقطة دي وهتطوري كثير وهتبقي ف مكان أحسن.

- ده شيء يشرفني جدًا يا فندم.

- أنا هستأذن عشان في ناس عايزني ف شغل.

- إفضل.

- أشوفك ف الشركه ف مصر إن شاء الله.

- إن شاء الله.

غادر المدير، وجلست مع سالم حتى انتهى المؤتمر، وأسعدتها كلماته، فأول مرة تشعر أن هناك أحدًا يفخر بها وبمجهوداتها وآرائها.

عادا إلى السكن، وعليهما البدء في تجهيز أغراضهما للعودة إلى مصر. هي أنهيت المؤتمر، وهو أثبت نفسه في عمله، وتمكن من الحصول على وظيفة في فرع الشركة التي عمل بها هذه المدة في مصر، وقد جمع مبلغًا معقولًا وهو ما أتى لأجله .. وكل شيء سينتهي.

واستقرت الحياة بين نور ومحمد بعد فترة من زواجهما.. بدأت نور تطمئن من فكرة إعلان ذلك الأمر، لم تعد ترفضه كما من قبل.. مرت شهور على حياة هادئة في بيتهما، كانا يحاولان ألا يقعوا في أخطاء وقع فيها الكثير من حولهما. يقتلان أي لحظة تفسد عليهما تلك السعادة، ربما لا يسمحان لها من الأساس بأن تأتي تلك اللحظة. دائمًا يتعاهدان(هنعيش مبسوطين .. مبسوطين وبس).

اعتادت مريم على زيارة نور في بيتها حتى لا يفترقا جلساتهما القديمة.

وفي واحدة منها :

- طب وخالتو رأيها إيه؟

- لسه ما حكيته لهاش.

- إنتي حاسه إنك مبسوطه من ناحية الفكره أصلاً؟

- شريف شخصيته حلوه ومحترم.. وبيحاول يفرحني على قد ما يقدر..

وما فيش حاجه تخليني أرفضه.

- ربنا يتملكوا على خير لو فيكوا خير لبعض.

- يا رب يا نور يا رب.

- هتعرّفي خالتو إمتي؟

- هعرفها اليومين دول.. عشان هو عايز يجي يتقدم في أقرب وقت.. على الأقل نقرا

فاتحه وأنا عايزه أخلص دراسه الأول ولسه فاضل ٣ سنين ودي فتره كفايه للخطوبه

عشان نعرف بعض.

- خير إن شاء الله بس إوعي تعملي الخطوبه غير لما اولد.. أنا عايزه أرقصك

حضرتك.

- ماهو اتني ماينفمش ترقصي بالونتك دي بصراحه.

- ماتقوليش على ابني بالونه.. بكرأ يجي ويطلع عينك.

- لسه ماعرفتيش ولد ولآ بنت؟

- لأ.. الدكتوره دي مش بتقول وانا ومحمد مش فارقه معانا أصلاً.

- كل اللي يجيبه ربنا كويس يلاً أنا همشي بقى قبل ما محمد يجي.

- يا بنتي خليكي اتعدي معانا.

- لا هروح عشان سايبه ماما لوحدها من الصبح ..
- خلاص تمام .. سلميلي على خالتو.
- حاضر عنيا.. واتي خلي بالك من البالونه بتاعتك.
- يلاً يا رخمه.

أخبار مريم جعلت نور ترتاح قليلاً، كانت دائماً تشعر أن مريم ضرتها، رغم أن محمد لم يفكر فيها للحظة، فهي كانت دائماً تخشى أن يكون شعور مريم تجاه محمد كما كان .. لكن ما سمعته اليوم يجعلها تصرف نظراً عن هذا. روت نور لمحمد ما روته مريم لها، وكان سعيداً بشأن ذلك، فمريم كانت من ضمن القائمة المشكوك بها .

عاد محمد من عمله .. يبدو على وجهه الغضب، ولم تعتد نور منه على ذلك!

- مالك يا محمد في إيه؟
- ما فيش عادي ماتشغليش بالك.
- عادي ازاي! إنت مش شايف شكلك ولا إيه؟!
- أنا عايز أسيب الشغل.
- ليه؟



- دكتور سعيد صاحب الصيدليه كلمني النهارده وقالى إنه هيجتاج يمشي واحد مننا.. أنا أو حسن الفتره الجايه عشان الأرباح مش مكفيه مرتباتنا.. وحسن هو اللي كان جايبلي الشغل ماينفعش بعد كل ده أحليه هو اللي يسبب الشغل وأنا أفضل فيه.
- طب وهنعمل إيه؟
- أنا كلمت الراجل بتاع إسكندريه اللي حاكتلك عليه قبل كده وقالى إن الشغل لسه موجود وهيبقى في سكن لينا هناك ولو استقرينا نبقى نشترى الشقه اللي احنا عايزنها هناك... هو قالى إنه نازل القاهره بكرة وهيفهمني التفاصيل.
- طب وماما.. هنعمل فيها إيه؟
- لو عايزه تيجي تعيش معانا خليها تيجي يا نور.. المهم نمشي من هنا.. أنا زهقت من المشاكل وعايز نرتاح شويه وكمان اتى كام شهر وهتولدي والمصاريف هتزيد وأنا مش هلاقي شغل بسهولة.. أنا عارف.
- ربنا كريم .. وديني عند ماما بكرة وانت رايح تقابل الراجل ده عشان أتكلم معاها وأشوف هتقولى إيه!
- ماشي يلاً ننام عشان واضح إن اليوم بكرة هيبقى طويل.
- يا ماما طب إتي مش موافقه ليه؟
- عايزه تسييني هنا لوحدي يا نور؟ أنا أصلاً وافقت على جوازكوا لما قولتوا إنكوا هتعيشوا ف الشقه دي وهتبقى قريبه مني.. جايه دلوقتي بتقولى تسافري؟

- طب سافري معانا يا ماما.. هتتعدي هنا عملي إيه؟
- لا.. أنا ماصدقت بقيت قريه من أختي ومش هفضل أثقل كل شوية ف محافظه..
- طب إيه الحل دلوقتي؟
- ماعرفش.. بس اعلمي حسابك لو سافرتي وسيتيني لا هيتي ليكي أم ولا هعرفك.
- يا ماما ليه العصبية وليه الأسلوب ده؟
- أنا قولت اللي عندي يا نور ... إحمدي ربنا إن لما أبوكي جه ماعملش مشكله ومابوطش الجوازه..
- هو اتني اللي كلمته يا ماما؟
- فارقه معاكي أوي يعني؟ ... واضح إن جوزك واكل مخك وهيخليكي عملي اللي هو عايزه.
- محمد يحاول بكل الطرق يرضيكي وإتي مافيش فايده فيكي.. واللي بتعمله ده هيخليني أعند وأسافر معاه..
- براحتك.. بس ماترجعش تعطي.
- قاطع تلك المناقشة الحادة صوت رنين هاتف نور لتفهم أنه منتظرها.
- إتي خيرتيني بينه وبينك وأنا هختاره هو يا ماما خدي بالك من نفسك.

.....



- ها.. عمليتي إيه؟
 - هنسافر إمتي؟
 - بجد؟ ... يعني وافقت؟
 - آه طلعت عيني ف الأول بس وافقت.
 - هتيجي معنا؟
 - لأ.. هتقعد هنا عشان تبقى قريبه من خالتو .. إنت عملت إيه مع الراجل؟
 - قالي إنه مجهز كل حاجه وهيقتعد هنا يومين كده لحد ما نجهز نفسنا للسفر...
ماتخافيش يا نور إحنا هتيجي نزورها على طول.
 - ابتسمت نور لأن جملته أيدت ما أخبرت أمها به.
 - ربنا يخليك ليا.
 - ويخليكي ليا.
- بدأت نور في إعداد الحقائب وأغراض السفر على الفور .. تريد أن تهرب قبل انفجار مناقشة جديدة بينها وبين ماجده .. زارت مريم وخالتها لتخبرهما بالقرار الجديد، وطلبت منهما إذا استقر حالهما هناك بأن يزوراها حتى لا تشعر بالوحدة، وطلبت منهما الاهتمام بماجدة.

.....

- ماما.. أنا عايزه اتكلم معاكي شوويه.
- قولي يا مريم عايزه إيه؟
- أنا جايلي عريس..
- إيه؟!
- جايلي عريس من الكورس اللي بحضره وعايز يجي يتقدم قريب..
- إتي متأكد من قرارك؟
- هو إنسان كويس وأنا مش عايزه أعقد نفسي.. فهنعمل خطوبه نتعرف على بعض أكثر.
- طيب.. خليه يجي الخميس الجاي.
- بجد يا ماما؟
- آه بجد.. وكلبي اعلمك بيتقوا موجودين.
- قَبَلت مريم أمها فرحة، ودخلت غرفتها لتخبر شريف بتلك الأخبار السارة.

- بجد يا محمد مش عارف أشكرك ازاى.. الموقف ده مش هنسا هولك أبدًا.
- يا بني ماتقولش كده إحنا اخوات يا حسن.
- وأكثر والله... المهم إنت مبسوط هناك؟

- آه.. أنا ونور مبسوطين جدًا هنا الحمد لله وإن شاء الله أول ماتولد هشوف شقه قريبه من الشغل نستقر فيها.
- ربنا يقومها بالسلامه... لسه أبوها بيرخم عليكوا؟
- لا.. إحنا من ساعة الفرح مانعرفش حاجه عنه تقريبًا.
- أحسن برضو ... بقولك إيه يا محمد.. معلش خمسه وهكلمك أخلص اللي ف إيدي ده وهتصل بيك على طول.
- قشطه يا معلم مع السلامه.
- دخلت نور غرفة المكتب التي اعتاد محمد أن يجلس بها بعد انتهائه من عمله؛ لتجده يضع قبضة يده على الأخرى، ففهمت أنه يفكر في شيء ما، فهو يأخذ ذلك الوضع حين ينهمك في التفكير.
- مالك يا محمد؟
- في حاجه غريبه جدًا!
- إيه هي؟
- حسن سألتني على باباكي ولسه عاملنا مشاكل ولّا لأ!
- فين المشكله؟
- إني ماحكنتش لحسن على حاجه أصلاً ... معقول يكون هو اللي قال لابوكي يجي يبوظ الجوازه عشان أسيب الشغل وأسافر؟!

- لا ماظنش حسن يعمل كده وبعدين مش بتقول انكوا صحاب من زمان.. أكيد مش هيعمل كده.
- أتمنى مايكونش هو.. وأنا مش عايز أفكر فيه كده.. بس ده اللي جه ف دماغى.
- ماتشغلش بالك بالموضوع ده.... أنا كلمت سلمى الصبح وقالتي إنهم مرتاحين أوي ف البلد وإن مامتك وباباك مبسوطين أوي.
- الحمد لله طمنتيني.
- عارف يا محمد؟.. أنا طول عمري كان نفسي يبقى عندي عيله زيكوا كده نبقي كلنا مرتبطين ببعض وبنسند بعض.
- ماحدث عارف الخير فين يا نور وبعدين هنعوضها ف عيلتنا احنا ... ربنا يقومك بالسلامه وتولدي الشهر ده وهنربي عيالنا على التأسك ده.
- يا رب يا محمد.... تعبانه أوي ومش قادره على شغل البيت لوحدي ومش عارفه أعمل إيه!
- ربجي وسبيك من شغل البيت وأنا هعمل كل حاجه.
- كفايه عليك شغلك.



الفصل السابع
(الاستسلام الوحيد المقبول هو الاستسلام للقدر).

تعلم أن صداقتهما ستستمر، لكنها تعودت عليه، وأصبحت تثق به كثيراً.. اعتادت وجوده في حياتها .. اتفقا أن أول شيء سيفعلانه بعد العودة هو الانفصال، حتى يعودان لحياتهما الطبيعية.

انتهت إجراءات السفر وتجهيزاته، وتحركا للمطار، وكان يرافقهما زميلها الذي التقيا به في بداية الرحلة، وقد سبقهما مديرهما بيوم، و كان يستقبلهما في المطار تقديراً منه لأدائهما.

في المطار :

- هوصلك الأول وبعدين هشوف هسافر البلد ازاى..
- طب ليه تتعب نفسك؟ ماتقلقش أنا هتعامل وهروح وانت كمان روح ارتاح شويه.
- لأ.. هتطمئن لما أوصلك أكثر.
- إحنا على اتفاقنا صح؟
- آه طبعا.

كانت تسأله، وتتمنى بداخلها أن يجيبها بالنفي، لكنه اتفقا وعليهما تنفيذه، وبينما هما يستلمان حقائبهما، وجدا مديرها بجوارهما وساطة، وكانت معه نجلاء جاءت لتستقبل سميحة أيضاً، ووجدتها سميحة تخبرها بشيء لم تستوعبه!



- في حد مستينيكي هنا من بدري..
- حد مين؟!
- هتعرفي لما نوصل على الباب وأظن إنها حاجه هتفرحك..
- أتمنى..
- خرجا ليضعا أغراضهما في السيارة التي ستتولى أمرهم.
- أهو واقف هناك اهو..
- تلتفت لتري من تقصد؟ لتجده هو .. من خان و فر! لماذا أتى إلى هنا؟! وكيف سمح لنفسه أن يفعل هذا؟!
- إيه اللي جابه هنا ده؟
- أنا فاكراكي هتفرحي!
- قبل أن تجيبها، كان قد اقترب بكثير، وسالم بجوارهما لا يفهم ما يحدث! لكنه لاحظ أن عبوس وجه سميحة كان بسبب وجود هذا الشخص. بصرف النظر عن هو! اقترب رامز منهم وبدأ حديثه:
- حمد لله على السلامه نورتي مصر.
- أجابته في برود:
- شكرا الله يسلمك.
- أمسك بيد سميحة بثلقائية، وكان يجذبها تجاهه لتسير معه.



- يلاً أنا هوصلك عشان عايز أتكلم معاكي.
حاولت أن تقلت يدها من يده.
- حاسب إيدك.. إيه الجنان اللي انت بتعمله ده؟!
سالم انفعل مما يراه فتدخل:
- إنت مجنون؟! إنت ازاي تمسك إيدها كده?!
بالطبع رامز ليس لديه أي معلومات عن أي شيء حدث
في الشهور السابقة!
- وانت مالك؟ إيه دخلك؟
- اللي انت شديتها من إيدها دي مراقي.
لم يقصد سالم أن يفتعل مشكله، لكنه كان واثقاً من أنها لا
تريد الذهاب مع هذا الشخص .. ورامز لم يستوعب كلمة
سالم؛ مما جعله ينفعل زيادة!
- إنت هتستعبط؟
لم يكذب ينتهي رامز من كلماته حتى وجدت سالم يلكمه
بضربة على وجهه جعلته يقع أرضاً.. حاولت تهدئته،
لكنهما ظلا في تلك المصارعة حتى تدخل الأمن،
وأصروا على أن يؤخذ سالم ورامز إلى القسم، وحاول
مديرها أن يمنع ذلك، لكن ما فعلاه من شغب لم يكن في
صفتها أبداً.

ذهبوا معهما إلى القسم، وأصر الضابط الذي حقق معهما أن يبيتا في القسم؛ باعتبارهما أثارا الشغب في المطار ونشرا الفرع فيه، وكان هناك وفد قادم من أمريكا، فزاد ذلك الأمر سوءاً.

خوفها على سالم سيطر عليها، فهو كان يساعدها فقط، وعليها أن تخرجه من تلك الورطة، فاتصلت بعمها المحامي ليأتي ويحل الأمر، وأتى على الفور، وشرحت له الموقف، لكن أسئلته كانت كثيرة:

- ماتصليتش بيا آجي أخدمك ليه؟

- ماكنتش عامله حسابي إن كل ده هيحصل.

- طب وهو مين سالم ده؟ وضربه ليه أصلاً؟

ماذا عليها أن تفعل الآن؟!.. تخبره بالحقيقة أم ماذا؟!.. على كل حال، ستنتهي علاقتها بسالم خلال أيام، فلا داعي للكذب، تريد أن تخرجه من تلك الورطة فقط.

- جوزي..

- نعم؟!!

لم يتوقع أن تكون تلك هي إجابتها، لكن بعد ما شرحت له ما حدث كله تفهم الوضع جدًّا، وطلب منها أن تمنحه قسيمة الزواج؛ لأن هذا سيجعل سالم في موقف الدفاع

وستنتهي قضيته بسرعة. أجاد عمها التصرف، وخرج سالم معهم، وظل رامز على ذمة التحقيق. اعتقد سالم أنها غاضبة مما فعله وحاول الاعتذار.

- أنا آسف والله.. بس أنا اتعصبت لإنه ضايك.

- آسف على أيه؟ أنا مش عارفه من غيرك كت هتصرف إزاي!

- يعني إتني مش زعلانه مني؟

- لا بالعكس.. أنا المفروض أشكرك.

نجلاء ظلت صامته منذ أن تحركوا من المطار، لكنها وجدت أن ما فعلته لا يغتفر، فحاولت أن تُصلح الأمر:

- أنا آسفه يا سميحه انا ماكتش عارفه إن كل ده هيحصل.. والله هو فهمني إنه عايز يرجعك و..

لم تمنحها الفرصة لتكمل ما بدأته.

- حصل خير يا نجلاء.. بس ياريت الموقف مايتكررش.

- أكيد مش هيتكرر.. أنا آسفه للمره الثانيه.

- خلاص روجي اتني عشان متتأخريش.

- هوصلك.

- لأ. متشكره.

بداخلها شعور أنها ستفقد أعصابها فجأة وستنقض عليها لتخنقها، فحاولت أن تترك مسافة بينهما..

- طيب أنا هستأذن يا سميحه واشوفك ف الشركه.

- إن شاء الله.

- مع السلامه.

غادرت نجلاء، وبدأت سميحة تهدأ وتستعيد توازنها ثانية، وعمها ما زال معهم، لكنه قدم عرضاً لا تظنه طبيعياً!

- ماتيحي معانا يا سالم.

نظر لها سالم في تعجب وعدم فهم! أهذا فخ أم طيب نية؟!!

- الوقت اتاخر وأنا لازم أرجع البلد.

- عشان نكون متفقين.. أنا ف كل الأحوال هعرف والد سميحه بموضوع جوازكوا.. ف الأفضل إنك تكون موجود.. وإحنا كده كده راجعين البلد برضو عشان سميحه تسلم على أهلها لإنهم مستنينها.

- إزاي ياعمي؟! انا وسالم متفقين إننا هنطلق ومافيش داعي حد يعرف وخصوصا بابا وأنا عايزه اروح على السكن وهبقي اسافرهم كمان يومين.

- أنا آسف يا سميحه.. أنا واجب عليا إني أقوله.. وبما إنكوا متفقين خافين ليه؟ وهما عارفين إنك رجعتي ماينفعش ماتسلميش عليهم.

قبل أن يردد، أشار لها سالم ألا تتحدث ورد هو:

- مايفيش مشكله.. دي حاجه تشرفني إني أزور أهل سميحه..

ربت العم على كتف سالم، وركبا معه سيارته واتجها لبلدتهم، وطوال الطريق تضع يدها على قلبها، وتدور في رأسها كل الاحتمالات.. تُرى كيف سيكون رد فعل والدها؟! أيمن أن تبقى على قيد الحياة؟!

فعلاً .. محمد كان يقوم بكل أعمال المنزل تقريباً لتجد نور الراحة الكافية .. يعلم أنها تبذل مجهوداً كبيراً في المنزل طوال اليوم، وكان سعيداً بمساعدتها دائماً لا يخبرها أن ما يفعله واجب عليه وليس تطوعاً منه حتى لا يشعرها بتعبه، لكن موعد ولادتها يقترب، ويخشى أن يشتد عليها الألم أثناء عمله، فقرر أن يطلب من ماجدة المساعدة، وحتى يقتربا من بعض أكثر في الوقت ذاته.

- إزيك يا ماما؟

- أهلاً يا محمد.. خير في حاجه؟

- معلش يا طنط إني صحيتك بدري.. بس نور معاد ولادتها قرب وأنا لوحدي معاها.. فياريت حضرتك تيجي تبقي جنبها اليومين دول.

تعجبت ماجدة من كلام محمد! هذا يدل على أن نور لم تخبره بما حدث في المقابلة الأخيرة، لكن قلبها لان.. ابنتها في حاجة لها ويجب أن تكون بجوارها في أيام كتلك، تنتظر ولادة حفيدتها منذ ولادتها لنور، فعليها ألا تفوت هذه الفرصة.

- طبعًا هاجي يا محمد بعد بكرة هاجيلكوا بدري إن شاء الله.. بس استناني ف الموقف عشان أنا ماعرفش الطريق.
- عنيا حاضر .. ربنا يخليكي لينا يا ماما.
- تسلم يا محمد.
- مع السلامة.
- سلام.

سلمى ... انشغلت بالروايات والكتب، وكانت تشعر بسعادة شديدة لأنها تفعل كما يفعل محمد، لم تكن تفهم متعته بين تلك الكتب، لكنها الآن تفهم سر انهماكه في القراءة والكتابة... جو القرية الصغيرة كان يشجعها على ذلك.. لم تمل، فهناك الحياة أسرية بشكل كبير، دائمًا يضحكون ويروون مواقفهم لبعض، وكانت تستمتع بذلك جدًا ... كانت تحب جلسات الأقارب، وتشعر بينهم بالألفة، وكانت يومًا بعد يوم تتمسك بقرار بقائها مع والديها، فهي منذ سنوات لم ترهم بتلك السعادة..

محمد أراد أن يخبر نور بخبر مجيء والدتها، يعلم أنها تفتقدها وتتمنى وجودها في لحظات كتلك.

- ليه يا محمد قولتلها تيجي؟

- أنا كنت فأكرك هتفرحي .

توترت نور

- مانا فرحانه طبعًا.. بس.. بس ماكنتش عايزه أتعبا.

- يعني هي لو ماتعبتش عشانك هتتعب عشان مين؟!

- عندك حق ... عندك حق.

- أنا هروح آخذها من الموقف بكرة.

- ماشي.. أنا هقوم أجهزها الأوضه اللي هتتعد فيها.

- خليكي اتتي.. أنا هقوم أجهزها.

وصلت ماجدة إلى الإسكندرية، وكان محمد في انتظارها في الموقف على حسب اتفاقهما، وحين وصلت إلى الشقة التي أقاما فيها تلك المدة، تعاملت مع نور كأن لم يحدث بينهما خلاف.. نور لم ترغب أبدًا بأن يعلم محمد برأي والدتها فيه حتى لا يحمل أحد منهما كرهًا للآخر، تريد أن تتحسن العلاقة بينهما، وبعد أسبوع من وصول ماجدة، جاء خبر سعيد من مريم .. خطبتها بعد ثلاثة أيام، وطلبت منهما أن يأتيا القاهرة باكرًا ليلة حتى تكون نور بجوارها طوال يوم الخطبة، لكن ماذا عن ولادة نور؟ اقترح محمد أن يبقىا في القاهرة حتى تتم ولادة نور ويتم السبوع، حتى يكونا قريبين من الجميع ويسهل على والديه الحضور، وأخبرها أنها ستسبقانه إلى القاهرة

حتى يُتم أوراق الإجازة، وسيصل في يوم الخطبة باكراً
ومعه الأغراض كلها، وواففته نور على ذلك .
أوصلهما إلى الموقف، واطمان على ركوبهما الأتوبيس،
وأمر نور بأن تتصل به أكثر من مرة حتى يطمئن عليهما
حتى يصلا إلى القاهرة.. إلى حيث طلبت مريم من
شريف أن ينتظرهما.

- يا مريم أنا بقالي ٣ ساعات واقف ولسه ماوصلوش.
- معلش يا شريف إستني شويه كان.
- طب إتصلي بيهم شوفيم فين؟
- إتصلت كثير.. الأرقام مقفوله وخايفه أتصل بمحمد أقلقه ... إستني ده هو
يتصل.

على الخط الآخر :

- مريم.. أنا بتصل بنور وماما وتليفونهم مقفول.
- وأنا برضو باتصل ومافيش فايده وخفت أكلمك تقلق عليهم.
- أنا قلقان من بدري.. بقالي ساعتين بتصل ومش عارف أوصلهم خالص.
- ماتقلقش إن شاء الله خير .. شريف مستنيم عند الموقف ومش هيمشي غير
بيهم.
- ربنا يستر .. لو وصلتوا لحاجه قبلي عرفوني.
- طبعا.. ماتخافش.



- أيوه يا شريف..
- ها وصلوا؟
- لأ.. محمد كمان مش عارف يوصلهم.
- أنا بدأت أقلق.
- وأنا والله خايفه عليهم جداً.
- ليأتي صوت مایسة: ها يا مريم.. في أخبار؟**
- لأ يا ماما.
- رينا يسترها يا بنتي.
- يا رب يا ماما.
- خليك مستني شويه يا شريف وخلي التليفون ف إيدك ولما يوصلوا طمني.
- حاضر سلام.
-
- بعد ساعات :**
- أيوه مين معايا؟
- حضرتك اللي متصل..
- ده رقم مراتي.
- أخيراً عرفنا نوصل لحد العربيه اللي كانوا راكبينها إتقلبت على الطريق السريع والإسعاف جت خدمتهم للمستشفى اللي على الطريق وخذنا تليفوناتهم عشان

نوصل لأهلهم.. بس التليفون ده كان مقفول فطينا الشريحة ف تليفون تاني
عشان نعرف نوصل لأي حد.

لم يسمع محمد من كل هذا إلا أن السيارة قد انقلبت علي الطريق. ظل يركض حتى وجد سيارة أجرة (تاكسي) كان يشعر أن السيارة لا تتحرك، رغم أن السائق يتحرك بأقصى سرعة ممكنة بعدما شعر بلهفته. ظل محمد طوال الطريق يتخيل زوجته وهي ملقاة على الطريق، وظل يفكر في ابنه أو ابنته. هل هما على قيد الحياة أم لا؟!
وهما على الطريق، وجدا مستشفى كبيرة، فأخبره السائق أن تلك هي المستشفى التي يبحث عنها..
فيترك له كل نقوده ويركض إلى البوابات ليجد الحركة بداخل المستشفى سريعة.. نقالات تتحرك يميناً ويساراً..
المرضات يركضن ... هناك جنث مغطاة .. يبحث عن وجه نور في كل هذا. حتى استوقفته ممرضة:

- حضرتك بتدور على حد؟

رد وصوته يرتعش: أأأ. أنا حد كلمني وقالي إن ..إن ..في عربية إتقلبت على الطريق وأنا مراتي ووالدها كانوا فيها..



الفصل الثامن
(إلى متى!)

وصلوا منزل أهل سميحة، وكان الترحيب من الجميع، خاصة من أمها. رحبوا بسالم، رغم أنهم لأول مرة يرونه فيها، إلا أنه يُحب من أول نظرة، وكرم الضيافة جعلهم ينسون أن يسألوا عن هويته.

طلب العم من والد سميحة أن يجلسا بغرفة بمفردهما، وكان عليها أن تنفرد بأمها لتشرح لها ما حدث كله، وبقي سالم مع البقية .

كانت تروي لأمها ما حدث، وهي تتخيل رد فعل والدها حين يسمع ما انفرد به العم معه من أجله.. لكن نظرات أمها جعلتها تتوقع الأسوأ! فلو لم تكن تحمل فطرة الأمومة لكانت دفنتها تحت التراب الآن..

قاطعهما دخول والد سميحة ليقول في حسم:

- دقيقة وتكونوا موجودين معنا بره.

أجابته أمها وهي ترتعش، فهي تعلم أنه لن يتهاون أبداً.

- حاضر خارجين حالا اهو..

خرج والدها وأغلق الباب بقوة جعلتها تتردد في الخروج، لكن ما قاله كان أمراً، وليس لديها أي خيار.

لبيا هي وأمها ما طلبه ، ليجدوهم ملتفين حول طاولة امتلأت بالفاكهة وأكواب الشاي، فهو حتى هذه اللحظة ضيف في بيتهم، وعليهم إكرامه، ووجدت أختها تنظر لها نظرات لم تفهمها!



و أخيراً جاء قرار القاضي في هذا الأمر

- طبعاً إتي عارفه أنا ممكن اعمل فيكي إيه بعد اللي عرفته!

نظرت أرضاً في خجل، فهي تعلم جيداً عقوبة ما ارتكبته، فهي عانددت العادات والتقاليد وكل شيء حتى تحقق حلمها. حاول سالم أن يعرض عليه حلوّاً، لكه لم يسمح له بذلك.

- إئتوا عملتوا كده بإرادتكوا من غير ما تاخذوا رأي حد وفضتوا اللي ف دماغكوا.. فعقابكوا إنكوا تكملوا غضب عنكوا.

فهمت ما يقصده ، لكن سالم لم يفهمه بعد، فنظر له ثم سأله:

- يعني إيه؟!

- يعني هتكملوا ومش هتطلقوا.. أنا ما عنديش استعداد الناس تاكل وشي بسبب عملتکوا دي..

- ازاي!

- ده اللي عندي .. في حل تاني:

- هو إيه؟

- تدفع ١٠٠ ألف جنيه وتطلقها.

متأكدة أنه وضع ذلك الحل لأنه يعلم أن سالم لا يملك ذلك المبلغ، فلن يكون لديه خيار سوى الموافقة فلم ينتظر إجابة سالم حتى

روح يابني عَرَّفَ أهلك إن فرحك الأسبوع الجاي والفرح هيتعمل وكل أهل البلد هيحضروا..

نظر لها سالم وكأنه يطلب منها أن تظهر أي رد فعل، لكن والدها أعلن قراره وحسم الأمر، ولكي ينهي الموقف، وقف ومد يده لسالم:

- نورتنا.

- أنا آسف.. بس كل اللي كانوا ف الحادشه إتوفوا .. البقاء لله.

لم يشعر محمد بنفسه وقد أمسك بها وكاد يخنقها:

- لا لا.. أنا مراتي لسه عايشه إنتي كدابه .. نور لسه عايشه ..

وإبني عايش .. إنتي كدابه

إلى أن أتى الأمن وانتشلوها من يده بصعوبة.

سائق التاكسي ظل منتظرًا بالخارج ليعطيه باقي أمواله، فقد منحه أكثر من حقه بكثير .. ليجده بين يدي الأمن يحاول أن يفلت منهم ولا ينطق سوى باسم نور.. أخذ السائق من بين أيديهم ليذهب به من حيث أتى معه. حاول أن يسأله عن عنوانه بعد أن فهم أن زوجته وحماته قد توفيتا في تلك الحادثة.. لا ينطق إلا بكلمات متناثرة غير مفهومة.. هو حي بجسده فقط.. حتى جسده أصبح

صَلْبًا لَا يَتَحَرَّكُ! .. رن هاتف محمد، لكنه ظل ساكنًا لم يتحرك، فأخذ السائق الهاتف منه:

- أيوه..

- أيوه يا محمد وصلت لأيه؟

- أنا مش محمد.. أنا السواق اللي بيوصله.

- طب محمد فين؟

- أنا كنت جايه من إسكندريه للمستشفى اللي على الطريق السريع ودخلت مستشفى وخارج حالته صعبه.. عرف إن مراته وأمها ماتوا وأنا مش عارف أوديه فين!

- إيه! نور ...

حاولت مريم أن تتماسك حتى تخبره بعنوان بيتهما وأغلقت الهاتف.

كانت مايسة قد سمعت وفهمت ما حدث.

- أختي .. أختي عايشه؟

حركت مريم رأسها نافية، وفجأة جاء صراخ مايسة ... انهارت مريم بجوارها... كيف حدث هذا؟! .. أهذا يعني أنها لن ترى نور ثانية؟! .. أهذا حلم؟! لكن متى تفيق منه؟! لو تزوجته لكانت هي من نامت تحت التراب الآن. بعد شهر:



لم تتم خطبة مريم وشريف بالطبع، لن تفرح بدون نور، لا يمكن. محمد بقي كالمسجون في شفته التي عاش فيها مع نور أسعد أيام حياته، يتخيلها معه في كل مكان، يظل يتحدث مع نفسه طوال الليل كأنها بجواره تسمعه، لا يستوعب أنها لن تكون في حياته! كيف بعد كل هذا العناء تتركه في منتصف الطريق؟! كيف تأخذ ابنيها دون أن يراه حتى؟! ... كيف تخلف وعدها؟!

عاد والداه وأخته ليكونوا بجواره، لكنه أراد أن يكون بمفرده، لا يريد أحدًا، فحياته قد غادرت، لن يعوض أحد وجودها، أمه لا تتحمل أن تراه هكذا، فذهبت إليه في يوم وظلت تدعو الله أن يقبل مقابلتها.. يذهبون إليه كل يوم ولا يفتح لهم الباب، لكنهم كانوا يكتفون بالاطمئنان عليه بأنه لم يؤذ نفسه على الأقل.. طرقت الباب.. لكنه فتح هذه المرة.. عانقته لدقائق.. تريد أن تخفف عنه آلامه، لكن لا تعلم كيف!.. هي تعلم ألم الفراق جيدًا ...

- يا بني ما بنفش تفضل كده هيجراك حاجة.
- ياريت يا ماما يجرا لي حاجة أنا عايز أروح لنور.
- بعد الشر عليك يا حبيبي .. عايز تسييني وتمشي؟! عايزني أتعذب زي مانت متعذب.

- مش عارف أعيش من غيرها يا أمي والله مش قادر .. إحنا كنا مبسوطين سوا .. المشاكل إتحت وكنت هتولد وإبننا كان هينور علينا حياتنا.
- ده قدر يا بني ربنا عارف الخير فين.
- فين الخير ده؟! .. أنا تعبت يا أمي.
- أكيد ربنا شايلك الأحسن.
- ما فيش أحسن من نور.
- لأ في.
- يعني إيه؟
- يعني تتجوز تاني يا محمد عشان تقدر تنساها.
- نظر محمد لأمه نظرة عتاب لم ترها منه من قبل! ...
لولا أنها أمه لكان صفعها ولربما قتلها!..
- .. لازم تتجوز واحده تملى حياتك عشان تقدر تعيش .. إنت لازم تكمل حياتك ..
الدنيا مش هتقف.



إلى متى؟!

إلى متى ستظل الرياح تتصارع مع أوراق الشجر فيسقط
البعض منها أرضًا والبعض الآخر يصمد؟! ولكن إلى
متى ستصمد؟!

ماذا عن آخر ورقة؟!

هل ستتمسك بفرع الشجرة على أمل أن تبقى حتى تنمو
الأوراق الجديدة؟! أم أنها ستلقي بنفسها أرضًا ليقينها بأن
الرياح لن تقبل ببقائها وحيدة أو مع الجدد؟!
فالبقاء للأقوى.

تشمئز الرياح من ثبات الأشياء، فهي خلقت لتُحرك
جمودهم .



الفصل التاسع
(جمعنا الفراق)

غادر سالم دون أن ينظر لسميحة، حتى شعرت أن الصدمة جعلت دماءه تنصب في قدميه، وأنه سيفقد توازنه فجأة، لكنه إلى أن غادر، كان يبدو عليه التماسك إلى حد ما. لم يكن لديها أي حلول في تلك اللحظة. كيف حدثت كل هذه الأحداث؟!!

حاولت أن تتفاهم مع والدها، لكنه كاد يوثدها بعدما فعلته، ولولا قربها منه وحبها لها لكانت الآن بجانب جدتها تحت التراب، اعتادت أن تقف الظروف ضدها، لذلك تقبلت ما حدث، أو بمعنى أدق، جُبرت أن تتقبله، فهي المُخطئ الأول، همها كله كان سالم، ماذا فعل بها لتجعله يكمل حياته معها رغمًا عنه؟! فهذا لم يكن الاتفاق بينهما من البداية. لم تجد حلاً سوى تنفيذ ما قرره والدها، ومع الوقت يجدان حلاً سويًا غير هذا، لكن كيف تخبر سالم بذلك، وكيف تجعله يطمئن؟ أتتصل به؟ لا تعلم رقم منزله. كانت تتمنى أن يظهر شخص يخترع هاتفًا نقلاً يُسهّل عليهم كل هذه الصعاب ويُقصر تلك المسافات؟! أمر واقع وعليهم تقبله

وصل سالم منزله ووجهه قد اصفر بعد أن هربت الدماء منه، وطوال طريقه يفكر في سيناريو يقنع به والدته بسرعة زواجه، فهو يعلم أنها على يقين بأنه ما زال

مشتتًا بعد خسارته حبيبة عمره فجأة .. يا الله! كيف يتحمل سالم كل هذا بمفرده ويكاد يكون لا يروي ما يحدث له لأحد أبدًا.

- السلام عليكم..

بمجرد تحية سالم ركض كل من في البيت إلى الباب، وكانت والدته في المقدمة، احتضنته كأنها لم تره منذ أعوام وأعوام، كاد يبكي وهو يضمها، لكنه إذا فعل فسيزداد الموقف سوءًا.

- نورت بيتك يا حبيبي .. ماقولتش ليه إنك راجع النهارده؟

- ماحبتش اشغلکوا وعشان تبقى مفاجأه.

- أحلى مفاجأه والله.

- ربنا يخليكي لينا ياست الكل.

جلست أخته الصغرى على فخذه حتى غرقت في نومها، فمذ شهور تنتظر أن تطمئن بوجوده معها، فهي تعتبره أباهًا؛ كونها لا تتذكر وجه والدها حتى، فقد فارق الحياة قبل أن تقدر على النطق.

- هاتيا يا سالم أدخلها تنام جوه.

- لا يا أمي.. أنا هدخلها خليكي اتتي هنا عشان حاجي عايزك ف موضوع مهم.

تغيرت ملامح والدته فجأة، لكنها حاولت ألا تظهر هذا.

- طيب أقوم أولع على الشاي.

دخّل سالم غرفة أخواته، ووضع أخته في فراشها واطمأن أنها ما زالت نائمة، لكنه جلس بجوارها لدقائق يفكر كيف سيقنع والدته بتلك التغيرات؟ لكنه على كل حال ليس لديه أي اختيارات.

عاد إلى حيث تنتظره والدته، وجلس على الأريكة ذاتها، وكانت عيناها تتساءل أكثر من لسانها، فبدأ حديثه حتى لا يزيد قلقها عليه.

- أي أنا تجاوزت!

في منزل محمد :

- إسمعنا مريم يا ماما؟

- هي الوحيدة اللي هتقبل إنها تبقى ضره.

كرر محمد كلمتها وتبدو عليه دهشته!

- ضره؟!

- آه ضره .. نور هتفضل عايشه جواك وهي الوحيدة اللي عارفه إنت كت بتحبها إزاي فهتحمك.

- إتي سلمى قالتلك حاجه؟

- إنت فاكركي عبيطه! .. أنا فاهمه من الأول.. بس كت عارفه إنك بتحب نور.

- طيب ماتتي عارفه إني بحب نور.. عايزاني أتجوز مريم ليه؟ إسمعنا مريم؟

- العلاقة اللي مافياش معافره مابتكلمش.. لكن اللي فيها على الأقل طرف واحد بيعافر ممكن تكمل.. أنا جربت قبلك .. إنك تتجوز واحده لا إنت بتحبها ولا هي

بتحبك مش هتعرفوا تعيشوا سوا يوم واحد.. لكن مريم بتحبك ولو اتجوزتوا أنا متأكده إنها هتحاول بكل الطرق إنكوا تبقوا مبسوطين وإنها تعوضك عن غياب نور الله يرحمها.

- الله يرحمها.

- ها قولت إيه؟

- هصلي صلاة استخاره وأرد عليكي.

- ربنا يقدمك اللي فيه الخير ويطمني عليك.

انتهت من جملتها وامتألت عيناها بالدموع.

- بتعيطي ليه دلوقتي بس؟

- صعبان عليا اللي يحصلك ده.. كان نفسي تعيش مبسوط .. كان نفسي بختك يبقى أحلى من بختي..

- مش إتي دايماً بتقوليلي ربنا مايختارش لحد حاجه وحشه؟

ابتسمت وحركت رأسها بإيماءة أن نعم.

- يبقى ماتخافيش عليا وادعيلي بس .

بعد يومين ..

جلست مع أختها (مديحة)، فهي ما زالت غير مدركة، لكنها تحتاج للنصيحة مهما كانت بسيطة.

- أنا مش فاهمه يا سميحة إزاي عملتي كده!؟

- مش وقته يا مديحه.. دلوقتي أنا عايزه حل .. سالم مالوش ذنب.. أنا هتحمّل غلطي.. بس هو ساعدني ووقف جنبي كثير ماينفّش بعد كل ده أدبسه كده.
- بصراحه هو صعبان عليا.. بس بابا مش هيقبل بأي حل تاني.
- رينا يستر يا مديحه. والله أنا تعبت ومش عارفه أعمل إيه وعمي ماسابيلش فرصه أتفاهم لا معاه ولا مع بابا.
- هو عرف إزاي أصلاً؟
- روت لها ماحدث في المطار وعواقب ذلك، وكان حاجباها قد تعلقا لأعلى جبينها.. و ردت بسخرية :
- سمّحه إتي متأكده إن كل اللي بيحصل ده حقيقه مش تخاريف منك؟
- أنا غلطانه إني بحكيك أصلاً..
- وقفت لتخرج بعدما شعرت باستهزائها، لكنها أمكست بيدها وجذبتهما لتجلس ثانية:
- بهزر خلاص أقعدي.
- بطلي رخامه.
- طيب طيب .. المهم رامت عمل إيه بعد كده؟
- عمي قالي إنه في واحد قريبه خرج برشوه واللي عرفه إنه أول ما خرج من القسم خد مامته واخواته وسافر.
- سافر فين؟

- مش عارفه ومش عايزه أعرف .. قصة وانتقلت ومش عايزها تتفتح ثاني.. خلاص أنا فعلاً بقيت بكرهه.
- ربنا يهديه ويهديكي.
- يا رب.
- المهم أنا هقوم أحضر العشا.. وبعد ماناكل إعملي حسابك إنك هتحكي لي كل حاجة حصلت من أول ما عرفتي سالم.
- دي قصه طويله.
- ماليش دعوه أنا عايزه أعرف كل حاجة بالتفصيل.
- ماشي بس خلصي بسرعه.

في منزل مريم، حيث تجلس مایسة مع شريف ووجههما قد ظهر عليه الشفقة مما يحدث، كان شريف مصدومًا في قرار مريم!

- طيب أنا زعلتها ف حاجة أو عملت حاجة غلط؟
 - إنت عارف يا شريف إني بعترك زي إبنك وإنت عارف كل شيء قسمه ونصيب واللي ربنا عايزه بيحصل.
 - ونعم بالله.. بس أنا من حقي أفهم.
 - مالوش لزوم.
- ومدت يدها له ومعها علبة صغيرة.



- الشبكه أهي وربنا يعوضك بواحد أحسن من مريم بنتي.
- واضح إن مافيش أمل وإني ماشي ف حيطه سد.
- ربنا يقدملك الخير يا شريف.
- طب هي مش هتطلع تسلم عليا حتى؟
- معلش.. كده أحسن وأنا آسفه بالنيابه عن بنتي.
- لأ مافيش أسف ولا حاجه أنا هستأذن.
- و هب شريف ليذهب بعد أن سدت والدة مريم كل الأبواب
بينه وبين بقاء مريم معه.
- إستى أنت ماخدتش الشبكه.
- نظر لها وهو يكتم كلمات داخله، لو باح بها لن يتوقف
من قسوة ما يشعر به.
- دي هديه مني لمريم ماقدرش آخذها.
- ما زالت مايسة معترضة على قرار مريم، لكنها لن
تجبرها على أن تستمر مع شخص لا تريده، لكن هذا لا
يمنع أنها تحب شريف وتحترمه كثيرًا.
- إنت طيب يا شريف وربنا هيكرمك إن شاء الله.
- إن شاء الله. بعد إذن حضرتك.
- مع السلامه يا بني.

ذهب شريف ليكمل حياته بدون مريم، حتى أنه لم يفهم ما فعله لتتركه هكذا! لكنه لن يكمل حياته مع شخص لا يريده. لم يعتد أن يلوم القدر وهو ظالم نفسه.

دخلت مایسة لمريم لتخبرها بما حدث، وبمجرد دخولها، سألت مريم في لهفة:

- ها مشي؟
- آه مشي .. ربنا يسأحك يا مريم إتي ماشوفتيش هو كان عامل إزاي!
- كده أحسن يا ماما عشان ماظلمهوش.
- يعني لو محمد ماكنش قالك إنه عايز يتجوزك كتي هتسيبي شريف برضو؟
- مش عارفه يا ماما.. بس أنا بجب محمد أكثر ويمكن ربنا عمل كل ده عشان نبقي مع بعض ف الآخر.. مش ده كلامك؟
- بس ذنب شريف ف رقبته.
- ربنا هيعوضه إن شاء الله.
- على فكره.. هو ساب الشبكه.
- ليه؟
- قالي دي هديه مني لمريم.
- أنا عارفه إنه محترم.. بس هو فعلاً يستحق واحده تحبه يعيش معاها.. أنا ماكنش هسعه.
- ربنا يكرمه ويكرمك يا مريم يا بنتي ويهديكي من الجنان اللي اتتي فيه ده..

- أنا هروح أكلم محمد واحكيه بقى.

روى سالم لوالدته ما حدث له منذ ظهور سميحة في حياته حتى اللحظة التي يجلس فيها معها وكلماته الأخيره جعلتها تطمئن.

- أنا فعلاً ف الأول وافقت عشان أقدر أتقدم لسميره.. بس بعد اللي هي عملته وبعد ما قربت لسميحه حببت سميحه أكثر وماكنتش بين لإننا كنا متفقين إننا مش هنكمل وماكنتش أقدر أتكلم لأنى كنت عارف إنها بتحب واحد تاني .. بس وقولت أنا هسيبها بظروفها وأهي الظروف عايزانا نكمل.

- يعني إنت بتحبها بجد؟

- بحبها جداً.

- طيب أنا عايزه أشوفها.

- هنروح كلنا عشان أطلب إيدها من أبوها ونتكلم ف التفاصيل.

- بالسرعه دي؟ مش لما اشوفها الأول.

- أنا متأكد إنك هتحبها زي مانا حببتها.

- خلاص يا بني ربنا يبسرلك الأمور.



الفصل العاشر
(ذکری)



يومًا ما ستتعاطف معك الحياة وتهديك شخصًا عوضًا عن أفعالها معك، سيكون لك حياة أخرى، سيكون جزءًا منك إن لم يكن أنت بأكملك، لكن متجسد في نسخة بشرية أخرى، بعيدًا عنك كان أم قريبًا، فعقلك خزن صورته ليكون لك ذكرى حزينة تارة، وذكرى سعيدة تارة أخرى، أحيانًا تحن الحياة للقسوة فتسلب منك من أحببت بدون مقدمات .. ربما كانت هناك مقدمات لكن تجاهلتها .. فكيف تظلم الحياة؟! فأنت أخفيت عن عينيك ما كان واضحًا.. أكمل مسيرتك في الحياة، فيمكنها أن ترسل لك آخر يكون عوضًا عن الراحل الذي أهدته لك مسبقًا بخدعة لم تكتشفها إلا بعد الفراق.

تسمع مريم صوت الباب فتركض لتفتحه وتجد مایسة أمامها، تلتقط أنفاسها بصعوبة من أثر صعود السلم:

- أهلاً وسهلاً يا ماما.. نورتي ادخلي ريجي من السلم.

تدخل مایسة وترتاح على أول مقعد حتى تأتي لها مريم بماء ترويها لتهدأ بعد ما بذلته من مجهود، فقد كبرت بما يكفي ليجعلها تتنهد من أقل حركة.

- إيه يا مريم.. مش هتفهميني جوزك عايزني ليه؟

- مش عارفه والله يا ماما.. هو اتصل بيا وقال إقولك تيجي عشان عايزنا ف حاجه مهمه.

- إتي مبسوطة يا مريم؟
- مبسوطة يا ماما .. أنا عارفه إني هفضل ضره ممها حصل.. وممها حاولت أسعده وهريحه هفضل التانية.. محاولاتي كلها فشلت إني أخليه ينساها.. أنا أحياناً بحسها موجوده معانا هنا ف البيت .. خصوصاً بعد ماسى بنتنا إسمها.. حسيت إنه بيعاقبني عشان إتي اللي كلمتي باباها من ورانا كلنا.. عايز يقولي إنها هتفضل ف حياتنا ممها حاولنا إنا نبعدھا .. بس مش هنكر إنه أحن راجل ف الدنيا برضو وإني بحبه ياماما.
- أنا عارفه إني غطت لما عملت كده.. بس أنا كنت شايفكي تعبانہ أودامي .. قلبي ماقدرش يطاوعني .. حاولت أخليكي مبسوطة.
- ماتخافيش عليا يا ماما.. أنا مبسوطة الحمد لله.. ربنا يخليلي نورهان بنتي.. هي اللي معوضاني عن كل حاجه..
- ربنا يباركك فيها يا بنتي.
- رن الباب ثانية، فركضت نورهان ذات العشر سنوات
لتفتح:
- هيبه بابا جه.
- ليدخل ويقبل جبينها ثم يلقي التحية على مريم ومايسة.
- حمد لله ع السلامة يا حبيبي..
- الله يسلمك.

ظلت نورهان واقفة أمام الباب وعيناها لا تلتفت عنه،
فتعجبت مريم أنها تركت الباب مفتوحًا بعد دخوله
فأمرتها:

- إقلي الباب يا نورهان.

رد هو بسرعة:

- لأ ماتقيليش أنا معايا ضيفه..

ف نظرت مريم لمايسة لتجدها هي الأخرى تنظر لها في
عدم فهم!

- ضيفة مين يا بني؟!

أشار بيده لتدخل، وحين دخلت كانت الصدمة! .. إتسعت
عينا مريم لما رأته:

- نور؟!

يعلو صوت هاتفه وهو في سيارته متجهًا لعمله ليبدأ يوم
روتيني سيطر عليه الملل من ازدحام الطرق، فلم يرغب
في أن يرى من المتصل حتى، لكن إلحاح هاتفه جعل
فضوله يدفعه للرد:

- آلو..

جاءه صوت سيدة لا يظن أنها صغيرة في العمر، بل
تبدو في الخمسينات:

- أيوه .. معايا الأستاذ محمد سالم؟

- أيوه إتفضلي..
- معاك منى مديرة دار السعاده للرعايه..
- تحت أمرك.
- بعد إذن حضرتك.. ياريت تشرفنا النهارده ضروري.
- ليه؟
- لما حضرتك تشرفنا هتفهم كل حاجه.. أنا هبعت لحضرتك العنوان ف رساله دلوقتي وأتمنى توصل على طول.
- أنا للأسف رايح شغلي دلوقتي مش هقدر.
- الموضوع مايستناش.
- طيب إبعيلي العنوان وهاجي على طول إن شاء الله.
- إن شاء الله يافندم. مع السلامه.
- أغلق الخط وظلت رأسه تفكر في سبب ذلك الاتصال وما يحمله له من مفاجآت لا يعلم أستغير حاله للأفضل أم لا؟! لكن فضوله جعله يسرع للعنوان الذي أرسل له فور انتهاء المكالمة.
- كان العنوان قريباً منه، فوصل بعد أقل من ساعة وسأل عن مكتب المديرية، وكان هناك من ينتظره ليصاحبه للمكتب، وحين وصل للمكتب :
- حضرتك الأستاذ محمد؟



- أيوه أنا..

هبت مُنى ترحيبًا به.

- أنا آسفه إني جبت حضرتك فجأة كده.

- لا ولا يهملك.. بس أتمنى يكون خير.

- خير طبعًا إن شاء الله .. إتفضل أقعد.

بدأت مُنى الموضوع مباشرة بعد جلوسهما:

- حضرتك كنت متزوج واحده إسمها نور وكانت راجعه مع مامتها وعملت حادثه؟

- مضبوط.

- إيه اللي حصل بعد كده؟

- كل اللي حصل إن حد اتصل بيا من تليفون نور وقال لي إنهم ف المستشفى اللي على الطريق وأنا روحت قالولي إن كل اللي ف الحادثة إتوفوا..

- طب ما سألتش على الجثث عشان إجراءات الدفن؟

- بصراحة لأ؛ لأن الصدمه كانت جامده عليا وكانت حالي صعبه ووصلوني ع البيت.

- أنا آسفه.. هسأل حضرتك آخر سؤال:

- إتفضلي..

- المستشفى اللي حضرتك روحت سألت فيها دي.. تفتكر إسمها أو مكانها على الطريق بالضبط؟

- لأ الحقيقة مش فاكِر إسمها.. بس هي كانت ف نص الطريق بين القاهره واسكندريه.
- يعني حضرتك سألت ف المستشفى اللي من ناحية اسكندريه مش القاهره؟
- تقريباً.. هو أنا ممكن أفهم في إيه؟
- بعد ما الحادِثه دي حصلت فعلاً نقلوا اللي كانوا ف العريه للمستشفى دي والعدد كان كبير والمستشفى ماعندهاش إمكانيات كفايه للعدد باعتبار إنها للطوارئ بس وفعلاً جزء كبير اتوفوا وده اللي ملحقوش يسعفوه ونقلوا الجزء الباقي لمستشفى هنا ف القاهره.
- مع كل كلمة تنطقها تزداد نبضات قلب محمد، لكنها مستمرة فيما تروييه:
- ومدام نور ووالدها كانوا من ضمن اللي اتقلوا للمستشفى دي لأن حالتهم كان ممكن تستنى.
- وقف محمد من صدمته!
- يعني نور مراتي عايشه؟!
- إتفضل أقعد وأنا هكمل لحضرتك:
- جلس محمد ثانية ونظراته تدل على رغبته في أن تقترب نهاية حديثها ليفهم.
- مدام نور إتوفت فعلاً ف الحادِثه.. لكن مدام ماجده كانت عايشه وجتلنا هنا ثاني يوم الحادِثه وحكتلنا اللي حصل وقالت إنها مش فاكِره أي مكان ليها واحنا قعدناها عندنا ف دار المسنين لحد ما نوصل لمعلومات عنها وماقدرناش

للأسف لإنها ماكانتش بتساعدنا إننا نوصل لأي حد يقربلها وهي مع الوقت
قربت أوي من الناس هنا..

- ويعدين؟

- بس هي ماكانتش لوحدها.

- يعني إيه؟!

- كان معاها طفله صغيره لسه مولوده .. مدام نور إتوفت لإنها لما وصلت
المستشفى كانت بتولد وماتت أثناء الولاده مش من الحادته وقعدنا مدام ماجده
ف مبنى المسنين وبنيت حضرتك كانت ف مبنى الأيتام..

لم يتمالك محمد دموعه، فانهمرت منه رغباً عنه.

- طب هما فين؟

- مدام ماجده إتوفت من شهرين لإنها كان عندها مشاكل ف القلب وكانت
متوقعه إنها تتوفى في أي لحظه وقالت إن ماحدش يعرف موضوع مرضها ولقينا
الجواب ده وسط حاجتها وكان لازم نقره وعرفنا نوصل لحضرتك من خلاله لأنها
كانت كاتبه شوية بيانات قدرنا من خلالها نعرف إن حضرتك زوج بنتها وإن
ذكرى تبقى بنتك وإنها لو جralها حاجه نوصل الطفله ليك وفهمنا إنها ماكانتش
عايزاك توصل لبنتك لأنها مالهاش غيرها.. وبما إنها اتوفت وحضرتك موجود..
فأيكيد حضرتك عايز بنتك تبقى معاك.

- طبعا.. هي فين؟

- هتبقى معانا حالا.

بمجرد أن انتهت من جملتها الأخيرة، كانت ذكرى قد وصلت مع أحد مسؤولي الرعاية ليجدها نسخة من أمها. ظن أن نور هي من تقف أمامه، هرول إليها وضمها إليه وهو يبكي، فهو ما زال لا يصدق أن ابنته حية، فهي على كل حال جزء من نور، لا فرق بينهما، سواء الطول، لكن الملامح نفسها، ونظراتها وابتساماتها وبراعة وجهها.

ضحك محمد بعد أن سمع مريم:

- لأمش نور .. بنتها .. ذكرى.

احتضنتها مريم وهي لا تصدق أن هذا يمكن أن يحدث! سألت ماييسة عن أختها وعن نور، فروى محمد لهم ما حدث كله وهو يحتضن ذكرى بذراع ونورهان بالآخر .. مع كل كلمة يرويها تبدو عليهم علامات التعجب مما فعلته ماجدة! وكانت ماييسة تبكي على أفعال أختها، فهي كل تلك السنين تفتقدها وتتألم بعد فراقها وهي ما زالت حية .. لماذا لم تبق ماجدة مع أختها تلك السنين؟ لماذا منعت ذكرى من عائلتها كل هذا؟!!

روت ذكرى كل ما حدث معها في الدار، رعاية ماجدة لها وحبها للمكان، وأنها كونت صداقات كثيرة هناك، دائماً كانت تسأل ماجدة عن والديها، لكن ماجدة تتهرب،



تجيبها عما يخص نور وتتهرب من أي شيء يخص والدها، رغم أن محمد كان يذكر اسم نور في كل موقف بينه وبين مريم، إلا أنها متأكدة أن وجود ذكرى ورعايتها لها سيقربه منها، فهي لم تكره نور أبدًا، لكنها لن تنسى أنها كانت حبه الأول .. وواجب عليها أن تعوض ذكرى عما فقدته في تلك السنوات من حنان أم وأب.

بعد يومين قرر محمد أن يسافر ليخبر والديه عن كل ما حدث، وكانت ذكرى تطلب منه أن ترى جديهما، فهي تشتاق للجميع رغم أنها لم ترهما من قبل.

ويتكرر المشهد ثانية .. سلمى تظن أن نور هي من تقف أمامها ووالداها لا يظهران أي رد فعل عند رؤيتهما لها حتى أخبرهما محمد بكل ما عرفه، وكان البيت كله سعيدًا لعودة ذكرى، حتى أبناء سلمى، رغم عدم إدراكهم، إلا أنهم أحبوا ذكرى على الفور.

طلب محمد من والدته أن ينفردا ليخبرها بشيء ما:

- فرحناك والله يا بني ربنا يباركك فيها وف نورهان.
- يارب يا ماما وباركلي فيكي.
- قول يا حبيبي عايزني ف إيه؟
- فآكره الحواطر اللي اديتهاي وأنا ف ثانوي لما سألتك إتي وبابا اتعرفتوا إزاي؟

- آه طبعا فآكره آنا الخواطر دي غاليه عندي أوي.
- آنا كنت بقراها كل شويه وكنت بكتب زهم بعد ما اتخرجت وعازب آخذ رأيك ف حاجه.
- قول يا محمد..
- آنا نفسي الناس كلها تعرف قصتك إتي وبابا وازاي حبيتوا بعض بعد ما جدو أصر إنكوا تكملوا الجواز ويعرفوا قصتي آنا مع نور ومريم..
- طب ودي هتعملها إزاي؟
- هعملهم رواية وأنشرها.
- طب وهتمسيها إيه؟
- تسميلي أسميا ذكري؟



تمت